

Ibulu Ibulu am ekņengat zapat meluwaņ kumindadaņ.

Zapat meluwaņ kapi kwiyaņ penaņ kuye ke sosok ku zemsokbembeņaņ. Pâlaņ zapat meluwaņ kukuņaņ sambe ikņaņgat kwitnaņ kumti, “Neņ kuya,” e ņep manzemkawaņbein. Âpme Ibulu kapiyet zet esemtaņ keboņ ņen ku tazin. Kogogapmti an nânânjin temaņ Kawawaņgalen zetgat nânâ mulup mamiwan kwiyaņ kup keyet zet mulup ikņakņen mamip. Ekņen nâmkiņpepeņinmak kukuņaņgat mambien ekņenaņ Pâlaņ kup zewien. Yaņgut Lutayaņ maņgeengatnaņ takwalip ekņenaņ kwiyaņ kup keyet zemusulalak zet omba mamip. Pâlaņ ku kup zewien e yaņaņ kapigogapmti zet ke zenzeņaņ. Egalen zapat meluwaņen ekbegen egaņ kuye set katnaņ kwep mâti kukuņaņ nemboņ yekgapmti zenzeņaņ. Zapat meluwaņ kapi kwitnaņ Ibulu kukuņaņ eneyet Zuda am ekņengalen zelin Ibulu.

Ibulu an ma imbi kwiyaņ zapat meluwaņ kapi kuyeyaņ am nâmkiņpepeņinmak ekņen sindem omba penaņ nâmkiņpepeņinaņgapmti tatimeyepm zemgwatnaņ zet ma nâmkiņpepeņin katikņaņ beme tatatgat nâmti zet kapi kuye. Zuda am ekņenaņ Kawawaņgat sesewatpesâti sâpe sâpe sepem ikņak ikņak mambumkwetemien kemak Zisasiyaņ an sâpe sâpe bumbu mulup mti sekņaņ sâpe buye keyaņ mobotnaņ bein

zemti zapat meluwanj kapi kuye. Sâpe sâpe bumbu mulup mkwakwatnanj keyet penañ ilak Zisasmagen sokbeye keyepmti tâtâ alaknanj ekmagen mimiñan ke ku elenğenğeyelen nâmti zapat meluwanj kapi kuye.

Zet ƚotekƚaƚ teman kapigogaƚ Ibulu zapat meluwanj keƚan talip:

1:1-5 Kawawaƚ alak pi set ikƚak ƚen aikzin Nemunaƚ Zisasiyaƚ set ke bein

1:6–7:28 Kilaisiyaƚ tâtâ itnaƚaƚgalen mulup an sebemindein

8–10 Ningalen sâpe sâpe bumbu an Zisas egaƚ sâpe sâpe buye keyaƚ sâpe sâpe bumkwakwatnanj ke sebemindein

11–12 Nâmkinpepeen ewe gwaƚ gwaƚ kumtatalen indakumtetitiƚaƚ delaƚ zenzeƚaƚ

13 Zet zemdelaƚ zenze zet

Zisasiyaƚ golan zenze an itnaƚaƚ mamkwabi-enmak ensel ekƚen sebemindein

1-2 Kawawaƚ egaƚ golan zenze an zemindeme ekƚenaƚ yeƚsokƚine ikƚaƚgat mundumann kan sepemaƚ ikƚak ikƚak ma zet setnaƚ yaƚaƚ ikƚak ikƚak mandiindom kwatnepemelak alak tatnuwen kapiyetnaƚ Zisasiyaƚ kosâpmnen kan keyet Kawawaƚaƚ ikƚaƚgat yaƚaƚ mkawaƚbeme delaƚ zenzeƚaƚ ikƚaƚgat Nemunaƚ penaƚ zem-peme toti zet tadiindoin. Kawawaƚaƚ Nemunaƚ keyaƚ kwitnaƚ kwitnaƚ sambe keyet toƚaƚ bemti mamayet ombempeye. Eneyet ege-laƚ ilisakwep mamti kwitnaƚ kwitnaƚ sambe ke mbun. ³ Kasupgat saƚga soƚgaƚaƚ mamekozin

sepem kegogak Kawawaŋgat yaŋaŋ penaŋ Nemunaŋaŋ mamsokbemkawaŋbein. Nemunaŋ ek yaŋaŋ iŋŋak yek; egegat yaŋit kwep. Zet dem-busekŋaŋ windenaŋmak zeme keyaŋ kwitnaŋ kwitnaŋ sambe kapi bandim mpeme matazin. Egaŋ ningalen bekaŋaŋ zulutndemti gwaen mogeyaŋ Amobotnaŋ Temaŋ egat betnaŋ penaset mundum windenaŋbeŋ keyet totazin.

Kawawaŋgat Nemunaŋ ensel ekŋen aŋgosomindemti mobotnaŋ tazin

⁴ Âpme Zisasiyaŋ ensel ekŋen sebemindemti motazin. Kogok mti ensel ekŋengalen kwit zet buŋam timtotindemti egaŋ kwizet buŋam temaŋ timti matazin. ⁵ Kawawaŋaŋ Nemunaŋgat nâmti zet kapigok zeye,

“Geŋ nâgât Nemun penaŋ; nit alak Bip Nemun belup.” *(Sam 2:7)*

Ma ŋen kapigok zeye,

“Neŋ gâgât Bipdi bemti mambap ma geŋ nâgât Nemun bemti mambanik.” *(2 Samuel 7:12-14)*

Ensel ekŋengat Kawawaŋaŋ zet kegok ŋen ku zeye. ⁶ Yaŋgut egaŋ Nemunaŋ kwewetaŋ ke msalen ewe peme tobe kan keyet zet pigok zeye, “Kawawaŋgalen ensel ekŋenaŋ ek pedondom samti sesewatpewep.” *(Sam 96:7-9)*

⁷ Kawawaŋaŋ enselŋene ekŋengat kapigok zeye, “Tâgâmak taŋamaŋ nâlen zet nâmti zetn mamâlupnok ensel ekŋen nâlen mulup angapmti zetn maŋgawepup.” *(Sam 104:4)*

⁸ Kawawaŋaŋ Nemunaŋgat gulak kapigok zeye,

“Kawawaŋ, geŋ Amobotnaŋ mundumdi katikpepepiŋ tatat kaliŋaŋ tapmeti mambanik. Ma Amobotnaŋ mamandi teŋ keyaŋ amobotnaŋgalen tonŋe ke nembon beme am indamusuwewet dolakŋaŋ penaŋ mbanik. ⁹ Geŋ mama mimi teŋ keyet tikŋaŋ manânik ma mama mimi bekanŋ keyet kasa mamnik. Kogogapmti neŋ gâgât nâmtikŋaŋ mti geŋ Amobotnaŋ tatagat ombemgemti kelakŋaŋ zulutgeap keyet nâmti oloŋen palen mambanik. Ke ensel ekŋen sebemindemti Amobotnaŋ tatagat ombemgemti kelakŋaŋ zulutgeap.”
(Sam 45:6-7)

¹⁰ Kawawaŋaŋ ŋen ewe kapigok zeye,

“Amobotnaŋ, geŋ yaŋbemberaŋ msat palen kwitnaŋ kwitnaŋ mbanan ma kululuŋgalen kwitnaŋ kwitnaŋ betdaŋ munduminan bemandemebenanaŋ tapmelip. ¹¹ Seŋgum melakandu keboŋ teŋgenŋaŋ mambeinok msat ma kululuŋ teŋgenŋaŋ bemti asekbalup. Geŋgulak mama kanzizit mamambanik. ¹² Kegok beme geŋ amnaŋ saŋgum taŋŋanaŋ mamunŋunpeme mewen kegok geŋ kululuŋ ma msat munŋuŋ timane mowembe. Geŋgulak sepem mambanan kegogak ewe mambanik. Ma an penaŋ bambepiŋ mamti mamambanik.” *(Sam 102:25-27)*

¹³⁻¹⁴ Ensel ekŋen tâgâ etaŋ mme ekŋenaŋ Kawawaŋgalen mulup etaŋ mamip. Kawawaŋaŋ ekŋen zemindeme meti am ekŋen ikŋaŋ gilik zemindatitiyet manâin ekŋen ke

maindamukulem mamimindeip. Kegok
mammnanjut Kawawanjan ensel njengat kapigok
ku dunduye,

“Kot betn penaset tapmane neŋ kasandine ekjen
kandanenen mulaloŋ indema selan in-
dim kapisik indemane topmâpme tabanik.”
(*Sam 110:1*)

2

Kawawanjan Nemunangat zet zein ke ku bankumpewep

¹ Nin weyanŋi zet eweŋan tiwen ke
bankumpewanupmagengat ewe tim kitik
mtabanup. Mneti Nemunangat zet zeye ke
pemann wembemagengat nâpeŋ mamambanup.

² Eweŋan Kawawanjan zet notnaŋ ensel ekjen
zemindeme Mosesiyet kot zeme egaŋ mtoge
ke diindome am ekjenan aŋgosowien ma ke
kulume keyet dopmaŋ Kawawanjan sakwep
mamutumindantan.

³⁻⁴ Amobotnanaŋ nin
aŋgalaŋ ndendeyet zetnaŋ iknaŋ zemkawanjan
beye. Âpme am soknaŋ tati wakŋin penaŋan
nâmbien ekjenan zet ke zemkotnepeme kalinaŋ
bemi tazin. Naman Kawawanjan iknaŋ muluwaŋ
mamanamaŋ notnaŋ mge ma menok notnaŋ
mti winderan sakam iknak iknak keyet yanjan
zemkawanjan bemi zetnaŋ ke mgwatnaŋ mge.
Egaŋ kegogak Emetak Tengalen taolet dolaknaŋ
nin kwep kwep iknangat kenanggalak ndaye.
Keyepmti Nemunangalen zet zapatnaŋ weyanŋi
ku timtabanup beme dopmaŋ penaŋ sukwep
mobotnaŋ mutumndawe.

Kawawaŋaŋ Zisas kwit zapaŋaŋ temaŋ saye

⁵ Msat alakŋaŋ sokbewe keyet zetnaŋ manzenup ke Kawawaŋaŋ ensel ekŋenaŋ damaŋ mimiyet ku zeye. ⁶ Kawawaŋalen Zet Itnaŋan an ŋenaŋ zet pigok zeye,

“Am nin pembenan yegaŋgut Geŋ ningat nâpen mamanan. Ma am nin Adangat nembanaŋe nin tototnaŋ yaŋgut Geŋ ningat damaŋ dolakŋaŋ matatnik. ⁷ Geŋ kan belaknik bugan ensel ekŋengat kandaŋinan mamayet zemndewanan. Yaŋ Geŋ nin busatnaŋ ma kwizet buŋam temaŋmak miakndewanan. ⁸ Mti kwitnaŋ kwitnaŋ sambe ningat setn kandaŋan baen mulaloŋ pewanan.” *(Sam 8:4-6)*

Kawawaŋaŋ kwitnaŋ kwitnaŋ sambe ningat kandaŋnan mulaloŋpeye. Kwitnaŋ kwitnaŋ kalelaŋpiŋ belak sembe melesiŋ nin damaŋ mimiyet ndaye. Kan pigogat kwitnaŋ kwitnaŋ ningat kandaŋnan maŋge bempepeŋaŋ keyet ku tapme maeknup. ⁹ Yaŋgut nin Zisas egat yaŋaŋaŋ nânup. Eweŋan kan belaknik bugan ensel ekŋengat tototnaŋin maŋge ke Egaŋ Kawawaŋalen keŋ taolet ke msokbembeyet ma am sambe indamukulem mti gakikiyet kegok maŋge. Egaŋ sek sindem temaŋ timti gakiye keyepmti Kawawaŋaŋ mwa-tonzempemti elimiak seŋge soŋgaŋaŋmak ma kwizet buŋamaŋ temaŋ ke saye.

¹⁰ Kawawaŋaŋ kululuŋ ma msat ma kwitnaŋ kwitnaŋ sambe mge keyaŋ ikŋaŋgat kwizet buŋam mmobogat nâmti mge. Ma amnaŋ kululuŋen mebegalen nâmti Nemunaŋ zempeme toti sek sindem tiye keyaŋ amnaŋ mama kanzizit

aikgalen setnaŋ beye. Kegok ke Kawawaŋaŋ amnaŋ nâmkîŋpepeyeen kwakwagat nâmti Zisasiyet nâmpeme ekŋengat Anŋalalaŋ Anŋin beye.

¹¹ Âpme am Zisasiyaŋ mme teŋ beip ekŋen ke ma Zisas ikŋaŋmak ekŋen mme teŋ bembenaŋ temakwep Biwin kwewetaŋ ke Kawawaŋaŋ keyepmti Zisasiyaŋ, “Ip meniŋne,” zenzeyet nâme nukŋaŋ ku mambein. ¹² Zet keyet zet ŋen kapigok zenzenaŋaŋ tazin,

“Neŋ buŋam zapadi ip meniŋne ekŋenmagen zempalakŋaŋ bewap. Neŋ ip meniŋne ekŋengat tuŋguwinan zemsesewatgewap.”
(*Sam 22:22*)

¹³ Ma zet ŋen ewe pigok zeye,

“Neŋ Kawawaŋgat nâmkîŋpemti penaŋ mam-bap.”
(*Aizaya 8:17*)

Naman ŋen pigok zenzenaŋ,

“Pi neŋ ma Kawawaŋaŋ ip meniŋne namâge ekŋenmak neŋ nsakwep tatnup.”
(*Aizaya 8:18*)

Zisas ek an penaŋ maŋge keyepmti egaŋ nin ŋep ndamukulem mimndewe

¹⁴ Âpme ip meniŋane ekŋen sek sesubaŋinmak mamaip kegogak egaŋ ekŋengat sepem timti indamukulem msâti sokbeye. Mme an penaŋ mame kume gakimti wage keyaŋ gakiki toŋaŋ Sadaŋ egalen windenaŋ mtopeye. ¹⁵ Mti gakikiyet kiŋgagat keyaŋ indatimti tapme kan kataŋ egalen mka katikŋan mamaip ekŋen indamenzemti-tiyet kekok mge. ¹⁶ Egaŋ mulup mge ke en-sel ekŋengat mti ku mge. Egaŋ Abalaamgalen

in̄sokɲane ndamukulem mimndesâti kegok mge.
¹⁷ Keyepmti Ek ip meniɲane ekɲenmak sepemin kwewetanɲ penanɲ bembeyet zempepenanɲ. Eganɲ kegok mti ɲep sâpe sâpe bumbu an ɲenɲanɲ mamti Kawawanɲgalen mulup mbe. Ek an anɲalanɲ gogot tonanɲ ma an mulup esemtenɲ penanɲ mamin ma eganɲ ɲep am sambeyelen yomin maasekmâzin.
¹⁸ Eganɲ sek sindem nâmti tetimaemaen mege keyepmti am nin tetimaemae sokbemndame ɲep ndamukulem mimndewe.

3

Zisasiyan Moses anɲosompemti mobotnanɲ beyeyanɲ matazin

¹ Kilaismagen notnne, Kawawanɲ kululuɲen mamainnanɲ Zisasiyelen mulupgapm indamandame kobien. Nin Zisasiyet kapigok nâmâtâti manzemkawanɲbenup. Ek sâpe sâpe bumbu an ɲenɲanɲ ma Kawawanɲanɲ ombempemti buɲam zapatnanɲ zemkawanɲbembeyet peme koge. Zisasiyet mulupmanɲ ɲen kegok ke mamingat nâpenɲ mamambep. ² Mosesiyan Kawawanɲgalen mulup nâmsemtenɲ mkwage sepem kegogak Zisasiyan Kawawanɲanɲ mulup mimiyet zempeye ke kogogak nâmsemtenɲ mge. ³⁻⁴ Nin an ɲenanɲ mka dolakɲanɲ mawalazin beme an mka walage keyet kwizet buɲamanɲ mamwatnup. Sepem kegogak Mosesiyet an dolakɲanɲ zenup yangut Zisasiyan kwitnanɲ kwitnanɲ sambe mme sokbeyeyepm egat kwizet buɲamanɲ mwawagalen. ⁵ Moses eganɲ Kawawanɲgalen mulup an mamti zet gawepupu mulup mti mamkwage. Keeset

bam sokbewe keyet bunam zapatnaŋ zenzeyelen keyet sisiliŋ annaŋ mamkwage. ⁶ Yanŋut Kilais ek nemuŋaŋ penanaŋ mka keyet toŋaŋ penanŋ mamain. Kawawaŋmagen nâmkijpepen tazin ke mkitikpem mamann nukŋaŋ sokbemndame katikŋaŋ bem tatnup beme nin ilak mka ke nemboŋ benup.

Islael am keŋ katik mambien nin sepem kekok ku mbanup

⁷⁻⁸ Keyepmti Emetak Teŋ egaŋ zet kapigok zeye ke in nâseip,

“Alak kapi in zetnaŋ nâseip beme in msat tuŋgupman tetimaemae sokbeme ŋenzinziŋ palen kwitnaŋ kwitnaŋ mbien kekok mti keŋ katik in ku mbep. ⁹ Yeŋ sokŋine ekŋenaŋ Neŋ msat tuŋgupman ke nup kan 40 menok ma ŋenzinziŋ kogogak mkwapma eknâmamkwebien. Yanŋut ekŋenaŋ neŋ mobotnaŋ omba mnamkwati yaŋŋ mnik kwabien. ¹⁰ Âpme neŋ keyet nâmsopkumindemti pigok zewan, ‘Kan kataŋ keŋ otnânâŋin kilenŋ mapeme mekozin mme ekŋenaŋ nâlen set ke ŋen ku ekmâtâbien.’ ¹¹ Kegok mbiengapmti neŋ ekŋengat ŋenzinziŋ mindamti zemkatik bembe pigok zewan, ‘Ekŋenaŋ nâlen kâtnânâ msatnan ke ku mebep. Yek penanŋ.’”

(Sam 95:7-11)

¹² Kilaismagen notnne, inmagengatnaŋ ŋenaŋ nâmkijpepe katikpemti keŋaŋ bekaŋaŋaŋ etaŋ bemisikme Kawawaŋ mama toŋaŋ ek bankumpenakmagengat eksemambe.

13 Kawawaŋ kan delan zenzenŋat zempeye ke nin ku nânup keyepm nin keŋ katik ku mti mamabanup ma Sadaŋ nâmpeman tetimaeen ndatowewegalen kawaŋaŋ ku sawanup. Kegogapmti nâmkijpepeen mamayet notn mukulem mukulem mti mabanup.

14 Nin nâmkijpepeen alagak kwabenen ke ewe mkipmaŋ bemti manepemann gakikiyaŋ ndaaikbe. Mti Kilaisiyaŋ ndamukulem mbe ke penaŋ nâmkatikbemti mabanup. Nin kekok mbanup beme nin Kilais egalen animbi penaŋ bewanup.

15 Kawawaŋgalen zelen kapigok zenzenŋaŋ,

“In yeŋsokŋineyaŋ Kawawaŋaŋ zet zeme nâmtiŋgut keŋin katikŋaŋ beme ŋenzinziŋ palen mamkwabien sepem kekok in egalen zetnaŋ alak pigokat nâmti keŋ katik palen ku mambep.” *(Sam 95:7-8)*

16 Am kwi ekŋenaŋ zetnaŋ nâmtiŋgut bamkumpemti egat ŋenzinziŋ mbien? Ke animbi Mosesiyaŋ ŋeŋaŋ bemindame Izip msat katikpemti kobien ekŋen keyaŋ kekok mbien.

17 Ma am kwi ekŋengat Kawawaŋaŋ nup kan 40 keyet keŋanen nâmsopkumindeye? Ke am yom sepem ikŋak ikŋak mti msat tuŋgupman gakim walet mbien ekŋengat kekok mge. 18 Âpme am deset ekŋengat Kawawaŋaŋ zemkatik bembe zet kapigok zeye, “Nâlen kâtnânâ msatnanen ku mebep?” Zet ke am egalen zet kulumti mambien ekŋengat nâmti zeye. 19 Keyepmti nin pigok penaŋ nânup, ekŋenaŋ ku nâmkijpewien keyepmti ekŋenaŋ Kawawaŋgalen kâtnânâ msat

dolakŋaŋ keyet keŋan ku mebien.

4

Kawawaŋgalen am nin kâtnânâ msalen mebegat zemndendeŋaŋ

¹ Kawawaŋgalen kâtnânâ msalen mebegat zetik mge ke ku asekmé delan zemâge. Alak pigogat ewe tazin keyepmti inmagengatnaŋ ŋenaŋ ku nâmkĩŋpemti selen met yuŋguwemagengat mama mimiŋin eksemti mamambep. ² Kawawaŋaŋ zetik mimindaye sepem keyegak nin zetik mimindain. Egaŋ zetik mimindame keŋinan penaŋ ku bempewiengapmti ekŋenmagen penaŋaŋ ku sokbeye. Zet zemkatik bembenaŋ ke nâmkĩŋpemti ku timambien. ³ Nin animbi nâmkĩŋpepemaŋaŋ Kawawaŋgalen kâtnânâ msat keyet keŋan tapmetnup. Eweŋan Kawawaŋaŋ kâtnânâ msat keyet pigok zeye,

“Neŋ keŋŋ kasa beme pigok penaŋ zemkatik beyap, ‘Ekŋenaŋ nâlen kâtnânâ msalen kapi penaŋ ku kobep yek penaŋ.’” (*Sam 95:11*)

Eweŋan Kawawaŋaŋ msat mge kan keyet kâtnânâ msat ke kegogak beye yaŋgut amnaŋ ke mesâgât ku manâmkĩŋpeip keyepmti egaŋ kogok zeye. ⁴ Âpme msasa 7 keyet keŋan kwep delan zenzeŋaŋgat kapigok zeye,

“Kawawaŋaŋ mulup sambe ke kasup mulup mimi 6 mme delan zemâpme msasa delan zenzeŋaŋ 7 keyet egaŋ kâtnâm tage.” (*Sokbembe 2:2; Kisim Bek 20:11; 31:17*)

⁵ Âpme zet keyegak ŋen ewe kapigok zeye,

“Ekñenañ nâlen kâtnânâ msalen kapi penañ ku kobep yek penañ.” *(Sam 95:11)*

⁶ Âpme pi am notnañ tatnup nin kâtnânâ msatn keñan mebegalen setnañ notnañ ñep tazingapmti keñan mobanup. Kogok keyañgut am tipman baenen mamkwabien ekñenañ zetik mimin-dame nâmbienañgut ku gawepuwien keyepmti ekñenañ kâtnânâ msat keñan ñep ku mebien.

⁷ Keyepmti Kawawañañ kan ñen ewe beye, ke bemti kan keyet kwitnañ “Alak” kumti kâtnânâ msalen mebegalen zetik mge ke ewe ñandem tage. Yañ mamkwati Kawawañañ zet ñen Dewit egat keñan beme egañ zet zein kegok zeye.

“Alak an ñenañ Kawawañgaleñ zetnañ nâsem beme keñañ katikñañ ku añañgalañ tasem.” *(Sam 95:7-11)*

⁸ Âpme Zosua egañ am kâtnânâ msalenan Kawawañañ zetik mimindeyeen indapmege. Ke etañ benak beme Kawawañañ zigoset kâtnânâ msat ñen ewe tazingat zeme Dewilañ zeye? ⁹⁻¹⁰ Eweñañ Kawawañañ mulup sambe mme delañ zeme tagom tage kegogak an ñen Kawawañgaleñ kâtnânâ msat keyet keñan mebeyañ mulupmañ mdelañ zemti kâtnâwe. Kawawañgaleñ am ekñengaleñ kâtnânâ msat ñen ewe tazin sepem Kawawañañ tambu msasa 7gat kâtnâyeen kegoknok ekñenañ kegogak makâtnâip. ¹¹ Kogogapm ninmagen ñenañ zet kululu keyelen mama mimi ke mâti mambeyet am eweñañ mbien kegogak ku mbep. In kâtnânâ msalen mebegat Kawawañañ mama mimi nâmtikñañ mamin ke windenañbenj mbep.

¹² Kawawaŋgalen zet ke winderŋaŋmak ma amgat mamaŋinan mulupmaŋ mamnen wanam kukŋaŋben kukŋaŋ bameset eyo tazin keboŋ. Keyaŋ am keŋin aŋme epeeme amgat yaŋaŋin sosok mamsokbein. Mti wanamaŋ kanziŋaŋgalen kelakŋaŋaŋ ma kanziŋ olalaŋaŋ aŋmann bikpenti mamekozin keboŋ. Kawawaŋgalen zelaŋ ammagen kegok mti keŋinaŋgalen ŋoktik yaŋaŋ yaŋaŋ maenzilim tamezin ke yaŋaŋin mamekzin.

¹³ Âpme kwitnaŋ kwitnaŋ aiikŋaŋ keyaŋ Kawawaŋgat zikatnan enzilimti ŋen ku matazin. Ekmagen kwitnaŋ kwitnaŋ sambe ke sosok etaŋ mawemâzin. Egat zikatnan nin nnaŋgat yaŋaŋ zemkawaŋbemâbanup.

Zisas ek ningalen sâpe sâpe bumbuyelen an ŋeŋaŋ temaŋ

¹⁴ Ningalen sâpe sâpe bumbu an ŋeŋaŋ ŋen tatndain ek kululuŋ mka keyet keŋan penaŋ mepmoge ek Zisas Kawawaŋgat Nemaŋaŋ keyepmti nin nâmkiŋpepen manzemkawaŋ benup ke mimkatikŋaŋ bemti mambanup. ¹⁵ Nin yomgalen winderŋaŋ kumann tototgalen winder ku tatndain yaŋgut sâpe sâpe bumbu an ŋeŋaŋ egaŋ tetimaemae sambe ninmagen masokbein ke ekmagen kegogak sokbemâpme delaŋ zemâge yaŋgut egaŋ yom ŋen ku mge. ¹⁶ Keyepmti nin Kawawaŋgat kiŋgagapiŋ ekmagen sokŋan mebanup. Zisasiyaŋ Kawawaŋ an keŋ taolet toŋ egalen mundum windeen totazingapmti nin nukŋaŋ ŋen ndaikme ekmagen mepmann keŋ

taoletnaŋ ma aŋgalaŋ gogotnaŋgat penanaŋ ndamukulem mimndewe.

5

¹ Sâpe sâpe bumbu an ŋeŋaŋ indaik indendeŋaŋ ekŋenaŋ amgat munduminan Kawawaŋgat zikatnan meti yomgat sâpe sâpe mambumtemien ma tewalaŋ timet bembeyet zemindendeŋaŋ. ² Sâpe sâpe bumbu an ŋeŋaŋ ikŋaŋ an penaŋ yomgalen tetimaeen ŋep tokukuyelen keyepmti am yomgat yaŋaŋ penaŋ ku nâmti yom mti set penaŋ katikpemtî ŋenen mebien ekŋengat ŋep sewakŋaŋ mamindain. ³ Keyet yaŋaŋ kapigogapmti am ekŋengalen yomgapmti etaŋ yek ikŋaŋgat eyo nâmti bumbuyet zempepeŋaŋ. ⁴ Mulup mobotnaŋ keboŋ ke an ŋenaŋ keŋagalek ikŋak ŋep ku mimiyeleŋ. Sâpe sâpe bumbu an ŋen Kawawaŋaŋ aikpemtî mulup same ŋep penaŋ mbe. Egaŋ Alongat setnaŋ munduman mâti kekok ke mpeye. ⁵ Sepem kekokak Kilais ek ikŋaŋgat nâme mobotnaŋ beme sâpe sâpe bumbu an ŋeŋaŋ temaŋ ku beye. Ke Kawawaŋaŋ pigok zemti zempeye,

“Alak neŋ gâgât kapigok zemkawaŋ besâwap,
‘Geŋ nâgât Nemun penaŋ.’” *(Sam 2:7)*

⁶ Mti naman zet ŋen Zisasiyaŋ sâpe sâpe bumbu an bembeyet ewe kapigok zeye,

“Geŋ Melkisedek nembon sâpe sâpe bumbu An
ŋeŋaŋ kwesiŋ kwesiŋ mamti mambanik.”
(Sam 110:4)

⁷ Zisas ek msalen maŋge kan keyet An gakikiengatnan mme belek zem wawagalen

winde tasaye egat Gesemani muluwen dundundu mge ke ñakñak palen omba penañ sumti zeye, “Kawawañ napmukulem mne.” Kegok zeme Kawawañ dundunduñ nâmpeye enenogat egañ Kawawañgat kandañ mtot meti pedondom saye keyepm Kawawañ winde same kingagapiñ gakikien moge. ⁸ Ek nemuñ penañ manje yangut egañ sindem tiye keyañ egalen zet gawepupuñ keyet yañañ tasaye keyepm mgwatnañ mge. ⁹⁻¹⁰ Zisasiyañ zet gawepumti gakiye keyañ sâpe sâpe bumbu an dolakñañ penañ kwage. Mti ek ke Melkisedek sâpe sâpe bumbu an temañ keyet katan sâpe sâpe bumbu an ekñengat ñeñañin mamayet Kawawañ zempaye. Keyepmti am zetnañ mangawepup ekñen ke yomengatnañ gilik zemindatitiyelen toñin penañ bemti mama kanzizit mama ke maindain.

Nemba isisik ekñengalen mama mimi keyet katan ku mambanup

¹¹ Melkisedek egalen zet omba penañ tazin yangut in wakñin bekekme mamaip keyepmti zet sewak sewak tadiidomopma nâmbep. ¹² In kan teepmañ nâmkijpepe aikbien mme no-lineyañ mama keyet yañañ zemzikat indawien kogogapm an zet zikat indanda ñep kwabiek keyangut in zet ke wisat palen tati yañañ penañ ku nâmatâbien keyepm am notnañ in ewe Kawawañgalen zet ñotekñañ ke ewe zemzikat indame weyañnâmatâbep. In ewe nam etañ niniyelen beip; meu katikñañ ñep ku niniyelen. ¹³ Am nam manip ekñengat nemba okak

kegok manzeip, ekñen kebonañ set de pembe-
 nañ ma de bekanañ ke ñep ku maekmâtâlip.
 14 Meu katikñañ ke am semem delañ zenzeñañ
 ekñengalen zapat. Keñinan nâmâtât talipgapmti
 bekanañ ma pembeañ ke kalan kumti maegip
 ekñen kebon keyañ meu katikñañ niniyet zapat
 beip.

6

*Nin nâmkijpepeen semem katikñañ bemti
 mambanup*

1-2 Âpme in alagak nâmkijpepeen kwati
 Kilaisiyelen zet zapatnañ yañañ imbelañañ
 nâmbien keyegak nâmti ewe belak etañ manâip ke
 peme tapme zet keyañ penañañ mimiyelen zein
 ke mâti mamambep. Kegok ke am nâmkijpepeen
 kaliñañ kwabien ekñenañ kegok mamip. Zet
 alagak nâmbien ke kapigok: mama mimi
 bekanañañ indamandame gakikiyet zapat
 mambienen keyelen yomengatnañ keñ gilik
 zenze zetnañ ma Kawawañ nâmkijpepeyet
 zetnañ ma tu zululugat yañañ nânâyet mzikat
 indandañañ ke ma am nâmkijpepeñinmak belin
 ñokñinan atata ma gakikiengatnan wawagalen
 zet ma am Kawawañañ zet zemdelañ zenze
 muluwen tabepgat zetnañ. In zet kebon ke
 etañ sakwalambemti zenzeyak windenañ ku
 mbep. Zet nâmkijpepeen mama mimi tototnañ
 mimiyelen ke zenâmti nâmkijpepeñin mkaliñ
 bembeyelen wemezin ke zenâ zenâ mti semem
 kaliñ bewep. 3 Nin kegok mimiyet Kawawañañ
 winde ndame timamti semem kaliñ bewanup.

4 Neŋ kekok zeyeyanŋut ŋen ewe kapi zesowap. Am notnaŋ Kawawaŋgalen Zet keyaŋ keŋin melen beŋ beme Zisasiyaŋ ekŋengat yominanŋat gakiye kekok nâmkinpewien. Kekok sokbeme am ekŋen ke Kawawaŋaŋ Emetak Teŋ indaye. ⁵ Ma Kawawaŋgalen Zet Zapat Dolakŋaŋ Penanŋ ke nâme keyaŋ keŋinan mealat mepme Kawawaŋaŋ menok notnaŋ bangat sokbewe keyet kataŋ mme ekmâtâlîp. ⁶ Am ekŋen kemagen kwitnaŋ kwitnaŋ kekok sokbeme ektingut ekŋenaŋ Zisas penaŋ sukwap bamkumpewien keyaŋ ekŋen Kawawaŋgat Nemunaŋ îlinak keŋinanek ewe tewen kumasasokpewienok beye. Mti am sambe zimoselinan egat kwitnaŋ mtopewien. Am keboŋ ke yomengatnaŋ keŋŋ gilik zenzeyelen setnaŋ ŋen ku taindain penaŋ.

⁷ Msat ŋen map topeŋ tati kwitnaŋ kwitnaŋ mme dolakŋaŋ kwapme am mulup mamip keyaŋ meu ma sikokok matinip. Ke Kawawaŋgalen tebumolet temaŋ keyet penaŋaŋ ke masokbe-mindain. ⁸ Ma msat ŋeniŋaset nusi temaŋaŋ kalak zewenn keeset penaŋepiŋ keyepmti bam msat ke Kawawaŋgalen wepuwaliliyaŋ dukŋan mopme tewen zim tobe.

Nin winde kumann kwapme mambanup

⁹ Notnne penaŋ, neŋ ingat zet kiŋgagatgalen zema manâip keyepm keŋ zut ku miap kegotat in set pembenaset mebep e nâyap. Set pembenanŋ mebep ke Kawawaŋaŋ indaŋgalan indewe kogok. ¹⁰ Kawawaŋaŋ kwitnaŋ kwitnaŋ mamnen teŋ etaŋ. Keyepmti egaŋ in

mulup dolakŋaŋ mbien keyet ku kandatin-demâbe. In Kawawaŋgat nâmtikŋaŋ mpeme keyaŋ kejin melaŋ beleaŋ mimindeme in egalen am indamukulem mbienok mmobep. ¹¹ Âpme nin in mulup windembenj kegok etaŋ mimiyet nâmindenup mti nâmkijpepenjin mkatikŋaŋ bemtati Kawawaŋgaŋ kot indatim mobogat damuŋ tabep. In kegok mti webematalip keyet penajaŋ indamâbe. ¹² In am nâmkijpepenjin kaliŋaŋ ma-maip ekŋengalen mama mimi ke mâti mti wisat sakwep ku mbep. Ekŋenaŋ Kawawaŋgaŋ kwitnaŋ kwitnaŋ ikŋaŋgat nemuŋene indandayet zetik mge ke timalip.

Kawawaŋgalen zetik ke penajaŋmak

¹³ Ekŋenmagen ŋen Abalaam ek Kawawaŋgaŋ zetik mti an mobotnaŋ kwiyet kwitnaŋ kumti zemkatik besap zem mgeyaŋ yek beme Kawawaŋgaŋ ikŋaŋgat kwitnanen bemti pigok zemkatik mti ¹⁴ pigok zeye,

“Neŋ penaŋ sukwep gwetnaŋ mgemti iŋsokdine sambe sopmaŋ penaŋ gawap.” (*Sokbembe 22:17*)

¹⁵ Âpme Abalaam ek zetik mge keyet damuŋ kan teepmaŋ wisatnepiŋ mamkwatneti bam penajaŋ aige.

¹⁶ Am nin amobotnaŋ ŋengat kwitnanen zetik minn beme zet zen ke bandim mti mman am nâyo keyaŋ ningat zet bamset ŋen ku zewep. ¹⁷ Keyepmti Kawawaŋgaŋ ek am zetik mimindame keŋ zut mbiekmagengapmti zetikŋaŋ mkaliŋaŋ bembeyelen zetik notnaŋ omba penaŋ ikŋaŋgat kwitnanen mge keyet penajaŋ

nin tiwanup. ¹⁸ Kawawaŋaŋ zetikŋaŋ mam ma zemkatik bembe ŋen mamm ikŋaŋgat kwitnanen eget zut keyet Kawawaŋaŋ dâsuki ŋep ku zenzeyelen. Zetikŋaŋmak zemkatik bembenaŋ penanaŋ masokbein. Keyepmti animbi nukŋaŋinmak kunzuŋti Kawawaŋmagen mepme egaŋ maenzilim indeingapm ekŋen keŋ oloŋen palen tatagalen. ¹⁹⁻²⁰ Sâpe sâpe bumbu an ŋeŋaŋaŋ Zelusalem sesewat mka keŋan ikŋak ŋen mamotan sepem kogok Zisasiyaŋ kululuŋen Kawawaŋgat ŋenzimosetnan mogeyaŋ nin ndamukulem mti ndadamuŋ mam. Egaŋ sâpe sâpe bumbu an ŋeŋaŋ ŋen kwesiŋ kwesiŋ maŋge Melkisedek keboŋ. Keyepmti nin Zisas mâti egaŋ mundum dolakŋaŋ motapmainen mosâgât webepŋ mamambanup.

7

Melkisedekmak Kilais egetgalen sâpe sâpe bumbu muluwit yaŋaŋ sepem kwep

¹ Melkisedek ek Salem mkaengalen amobotnaŋ maŋge ma Kawawaŋ Amobotnaŋ temaŋ egalen sâpe sâpe bumbu mulup keyet anan kekok maŋge. Egaŋ Abalaam met amobotnaŋ kasaŋane indomindamâti gilik zemkopme an keyaŋ met sellen aikti zemgwatnaŋ mpeye. ² Mme Abalaam ek milawat sambe kasaŋane ekŋenmagengatnaŋ indamâti timkoge ke kalaŋ kumti maŋge 10magenatnaŋ kwep keyet kataŋ Melkisedek saye. Nin zetnaset kwit Melkisedek ke gilik zewennegen

kapigok benak: “Tenngalen Amobotnaŋ” ma kwitnaŋ ŋen Salem mkaengalen* amobotnaŋ kwit keyet yaŋaŋ kapigok zenzeyelen, “Mamasiyelen Amobotnaŋ.”³ Melkisedek ek mamaŋ bipmaŋpiŋ ma yeŋsokŋaŋ mee ku zemkawaŋ bembenaŋ. Ek mamaŋaŋ ambege keyelen kanaŋ ku nâip ma gakiye keyelen kegogak kanaŋ ku nâip.† Ek Kawawaŋgalen Nemuŋaŋ keyet sesepmaŋ sokbembeyet zenzeŋaŋ keyelen sâpe sâpe bumbu An ŋeŋaŋ mulup kwesiŋ mti maŋge.

⁴ Nin pigok nânup Melkisedek ek an tototnaŋ yek; ek amobotnaŋ temaŋ keyepmti ningat yeŋsokŋ Abalaam egaŋ milawat dolakŋaŋ etaŋ kalaŋ kumti maŋge 10magengatnaŋ kwep egat saye. ⁵ Abalaamgat iŋsokŋane am maŋge temaŋ kogogapm am maŋge Liwai zep ekŋenaŋ sâpe sâpe bumbu mulup ke mimiyet zemindendeŋaŋ. Âpme Abalaamgat iŋsokŋane am maŋge notnaŋ ekŋenaŋ Liwai am maŋge ke indikdamuŋ mimiyet milawalin maŋge 10magengatnaŋ kalaŋti kwep indandayet zii zelen zemâtâtâtnaŋ. ⁶ Yaŋgut Melkisedek ek Liwai am maŋgeengatnaŋ ku sokbembenaŋ. Keyaŋgut Abalaam an zetik mpepeŋaŋ ekmagengatnaŋ milawat maŋge 10 keyetnaŋ kwep ke etaŋ Melkisedek same egaŋ zemgwatnaŋ mpeye. ⁷ Amobotnaŋaŋ an tototnaŋ zemgwatnaŋ mamimindeip. Set kekok tazingapmti Melkisedegaŋ Abalaam

* **7:2:** Kwit kapi Zelusalemgat kwitnaŋ itnaŋaŋ penaŋ kum mamaŋaŋ. † **7:3:** Melkisedek egat mamaŋ ma bipmaŋ ma yeŋsokŋaneyet Kawawaŋgalen zelen yaŋaŋ ku kukuŋaŋ yaŋgut mulupmaŋ mgeyeen Zisasiyaŋ mbe keyet katanŋ mge.

zemgwatnaŋ mpeye keyaŋ zeinen Melkisedek ek amobotnaŋ. ⁸ Israeŋ an ekŋenaŋ milawalin kalaŋ kume maŋge 10 mopme maŋge kwep timtati Liwai maindaktemien. Am maŋge ke mamoti an penaŋ bemti magakimtemien. Âpme Melkisedegaŋ milawat maŋge kogok titiŋaŋaŋgut Kawawaŋgalen zelaŋ egat pigok zenzenaŋ ek mama kanzizit tapmain. ⁹ Neŋ zet keyet yaŋaŋ ŋen pigok nâypapapm zewi. Zuda am ekŋenaŋ Liwai ekŋen milawalin maŋge 10magengatnaŋ kalaŋti kwep maindaktemien. Yaŋgut Abalaam ek Liwai ekŋengat yeŋinaŋgut egaŋ naman milawatnaŋ maŋge 10magengatnaŋ kalaŋti kwep Melkisedek saye ke Liwai ekŋenaŋ ku mamtemien ke yeŋinaŋ mge. ¹⁰ Eneŋogat kegok zenup? Melkisedegaŋ Abalaam selen met aikge kan keyet Liwai am maŋge ekŋen ku sokbewienaŋgut yeŋinaŋ Melkisedek saye keyaŋ ekŋenaŋ mbienok bein.

Sâpe sâpe bumbu an alakŋaŋaŋ itnaŋaŋgalen mundum timâbien

¹¹ Liwai sâpe sâpe bumbu an muluwin mkwabien ke zii zelaŋ zein katanŋ mâti mme keyaŋ am sambeyelen yom zulutme delaŋ manzem manak ze Kawawaŋaŋ sâpe sâpe bumbu an ŋen ku aiknak. Yaŋgut egaŋ sâpe sâpe bumbu an ŋen Melkisedekgat sakam mwatomezempeye. Kewan Alongat sipmaŋ butnaŋ mâti aiikgalen zii zelaŋ zein katanŋ ku mimiŋaŋ. ¹² Alongat iŋsokŋeneyaŋ sâpe sâpe bumbu an mamayet Mosesiyaŋ zemkaliŋ beye kelak asesekŋaŋ mme zii zelaŋ mulup keyet zet zemâtâtâtnaŋ ke

kogogak asekmâzin. Mme sâpe sâpe bumbu an kwakwagalen Kawawaŋaŋ setnaŋ alakŋaŋ zuluzin. ¹³ Kawawaŋaŋ sâpe sâpe bumbu an mwatonzempesâpm ke Liwai am maŋge ekŋenmagengatnaŋ yek. An ke am maŋge ŋenmagengatnaŋ sokbeye. Egat yeŋene ekŋenaŋ sâpe sâpe bumbu an mulup ŋen ku mbien. ¹⁴ Amobotnaŋ ek Zuda maŋgeengatnaŋ sokbeye ke nânup. Âpme Moses egaŋ an maŋge ekŋen keyaŋ sâpe sâpe bumbuyet mulup zet ŋen ku indaye. ¹⁵ Pigok penaŋ sokbemkawaŋ bein sâpe sâpe bumbu an kwakwagat Mosesiyaŋ zii zelen zemâtâge ke ilak asekmâzin mme sâpe sâpe bumbu an alakŋaŋ Melkisedekgat sakam sokbein ke Zisas. ¹⁶ Ek Alongalen sip mâti sâpe sâpe bumbu an ku kwage. Kawawaŋaŋ sâpe sâpe bumbu an ŋeŋaŋ onzempye enenogat egaŋ gakikiengatnaŋ wati gakikiyet windenŋaŋ mtotpeyeyepm mulup ke saye. ¹⁷ Kawawaŋaŋ keyet pigok zeye,

“Geŋ Melkisedek sâpe sâpe bumbu an ek keboŋak tapmeti mamambanik katikŋaŋ.” *(Sam 110:4)*

¹⁸ Keyepmti zii zetgalen zemâtâtât eweŋan zenzeŋaŋ ke windeneŋeŋiŋ ma penaŋeŋiŋ beye keyaŋ nin yomengatnaŋ ŋep ku ndaŋgalaŋ ndendeyelengapm kapume keŋan motazin. ¹⁹ Zii zelaŋ an mukulem mpeme Kawawaŋmagen sokŋaŋ ŋep ku mege keyepmti Kawawaŋaŋ set ŋen aikge keyaŋ dolakŋaŋ penaŋgat dolakŋaŋ bein, eneyet set keyaŋ katnaŋ bem ndamandame Kawawaŋmagen sokŋanik mametnup. ²⁰ Kawawaŋaŋ Zisas sâpe sâpe

bumbu ñeñangalen mulup mimiyet zempeye ke belak etañ penañ ku zempeye. Kawawañañ Nemunañañ mulup ke mimiyet zet penañ ikñañgat kwitnanen zemkatikñañ bemeti zempeye. Sâpe sâpe bumbu an mamkwabien ekñen zemkatikñañ bemindeme mulup ke ku mbien. ²¹ Zisas ek Kawawañañ ikñañgat kwitnanen zemkatik bemti sâpe sâpe bumbu an onzempeye. Mti Kawawañañ pigok zeye,

“Amobotnañ zemkatik bembe zet zeye ke penañepiñ ku bewe. ‘Geñ sâpe sâpe bumbu an ñeñañ mameti mamambanik.’”

(Makuku 23:19; 1 Samuel 15:29; Sam 110:4)

²² Keyepmti nin kapigok nâsenup, Zisasiyañ tâtâ alakñañ aige ke dolakñañ penañ. Keyañ tâtâ tipman baen wemkwege ke sebempemti mobotnañ ñen tazin.

Zisas sâpe sâpe bumbu an egañ ñep ndamukulem mimndewe

²³ Eweñan baenen an sambeyañ sâpe sâpe bumbu an mamkwabien yañgut ñeñañ mameti gakime ñeñañ kegok mkwabien. ²⁴ Keyañgut Zisas ek mama kanzizit mamain keyepmti sâpe sâpe bumbu mulupmanñ ke kwesiñ kwesiñ wemeti wembe. ²⁵ Ma Zisasiyañ kogogak kwesiñ kwesiñ mamti ningat Kawawañ mandundum sain kegogapmti nin Kawawañañ ndamukulem mindendeyelen nâmti sokñanik meppmann Zisasiyañ ñep añgalañndendeyelen.

²⁶ Ningalen sâpe sâpe bumbu an ñeñañ alakñañ ek keboñañ ñep penañ ndamukulem mamin. Ek mamañañ kwetetepmanñ, mimyugugunepiñ, ek

ten penan. Ma Ek yoman nen ku tazin yek penan. Ek am yomton eknenmagengatnan Kawawanan kalanti iknak onzempeye. Egan kululunen gwaen Kawawanmak motazin. ²⁷ Ek sâpe sâpe bumbu an nenan mamkwabien eknen kebon yomton yek. Eknenan kasup nen kasup nen ilinangat yominangat sâpe nenan bumtingut anjine ekngalen yomgat bam mambumtemien. Yangut Zisasiyan iknangat kenan seknan keyan am ningalen yomgat sâpe sâpe sek kwep bume keyan sâpe sâpe bumbu mulup ke ilak mdelan zeyeyan matatmopmambe. Ke iknangat gakikinan. ²⁸ Mosesiyelen zii zelan sâpe sâpe bumbu an maombemindentan eknen ke an yomton. Yan zii zetgat baman Kawawanan iknangat kwitnanen zemkalinbemti Nemunan Zisas sâpe sâpe bumbu an nenan onzempeye. Egan sâpe sâpe bumbu mulup ke nep penan mdelan zeyeyem kwesin kwesin mamti mambe.

8

Zisas tâtâ alaknngalen sâpe sâpe bumbu an nenan tazin

¹ Zet zemkokotnan keyet penanan kapigok: Ningalen sâpe sâpe bumbu an nenan bemndemti matazin Zisas ek kululunen gwaenen Amobotnan Tema Kawawan kwizet bunamanmak egalen mundumen moti betnan penanset windeyelen mundumanen mogeyan tazin. ² Egan kululunen Kawawanngalen sesewat mka keyet kenan sâpe sâpe bumbu an nenan mulup mamin. Sesewat

mka ke amnan ku walalatnan; Amobotnanan
iknan zeme wenje.

³ Sâpe sâpe bumbu an nenan eknen sambe
meu ma songom notnan sâpe sâpe bumbuyet ma
tewalan bembeyet zemindendenan. Kegogapm
Zisas sâpe sâpe bumbu an nenan egan sâpe sâpe
buye. ⁴ Mti ek msalen alak kapi manak ze sâpe
sâpe bumbu an ku manak. Msalen zii zelen
zein keyet katan sâpe sâpe bumbu an eknenan
sâpe nep mambuip. ⁵ Sâpe sâpe bumbu an
eknenan muluwin sesewat mka wenan ma sesep-
man walalatnan keyet kenan mambuip. Âpme
sesewat mka penanan ke kululunen gwaen tazin.
Moses egan sesewat mka zegwem zegwem time
mosâpmme Amobotnanan pigok dunduye,
“Nânik kalanan gwaenen sepeman zikat game
ekbanan keyet katan walabanik.” (*Kisim
Bek 25:40*)

Tâtâ alaknan galen zet

⁶ Tâtâ alaknan keyan tâtâ itnanan sehem-
penti mobotnan tazin. Ma Zisasiyan tâtâ
alaknan keyelen an tungupman mobotnan tati
tâtâ itnanan galen sâpe sâpe bumbu an nenan
mambien eknen kegogak sebemindem tazin.
Ma zemkatik bembe ewenan miminan keyelen
zetiknanan zemkatik bembe alaknan kapiyelen
zetikmak sepem kwep ku belup; alaknanan sehem-
pein. ⁷ Ewenan tâtâ itnanan wenje keyan
am mme dolaknan bewien ze tâtâ alaknan nen
ewe sokbembeyet zetnan nen ewe ku sokbe-
nak. ⁸ Kawawanan amnanayan myungum same
keyepmti pigok zein,

“Kan ñen neñ nâmtalap ke sokbeme neñ tâtâ alakñañ Israeal am ma Zuda am ekñenmak msowap. ⁹ Eweñañ yeñsokñine Izip msalengatnan indatimti msalinan met indesâgât meti tâtâ ekñen mindewan keyet katan alakñañ mbap eyañ itnañañ sebempewe. Ekñenañ tâtâ keyet keñan nânâñ ku mambien keyepmti neñ bamkumindewan. Neñ Amobotnañañ zet kekok zeap. ¹⁰ Neñ bam Israeal am ekñenmak tâtâ alakñañ msât zewan ke kapigok, Neñ nâlen zii zet ñen ñoktikñañan bemindewap. Ma keñinan kumpema tabe. Mme neñ Kawawañañ mambap âpme ekñenañ nâlen aminne mam nembep. ¹¹ Âpme an ñenañ notnañ ñen ma meninañ ñengat pigok zemti ku zemzikat sampewe, ‘Geñ Amobotnañ egat yañañ weyañ nâmbek,’ kekok ku zewe yek. Kan keyet am sambe tototnañ ma mobotnañ ekñenañ nâgât yaññ nâmâtâpme delañ zemâpbe. ¹² Ma neñ yomin ma myuñguñguñin sambe katikpemâbap. Mti kandatnome mamambap.” *(Zelemaia 31:31-34)*

¹³ Âpme Amobotnañ egañ tâtâ ke mti keyet, “Alakñañ” zeye. Kegok zemti itnañañ tâtâ tage keyet tañganañ zeye. Âpme kwitnañ kwitnañ tañganañ bemi maetimben ke belaknik tati ilak endeletme mandelañ zein.

9

Kawawañgalen sesewat mka zegwem zegwem

¹ Tâtâ itnanan Kawawan sesewatsasayelen setnan tageen ke mâti mkananmak ma munduman sesewat mka zegwem zegwem msalen tage keyet mamtemien. ² Sesewat mka zegwem zegwem ke teepman walati kejan kutume zut beye. Kejan nenan keyet “Kambukan” kuwien keyet meu bem nini munduman tage keyet palen nupmaman Kawawangat zapat mambumbemtemiengalen mundum ma tanam bumbuyet munduman golan weyayan kogogak matatan. ³ Âpme san gum teepman tungupman ke opem peme totapme mka kejan nen iknak enzilinan keyet kwitnan “Kejan Kambuk Penanngat Kambuk” kekok kuwien. ⁴ Keyet kejan kasak sesiknan dolakan bumbu keyelen mundum golan mpewien. Ma Kawawanan tâtâ amnanemak mti zii zet indaye keyelen bogis beke keyegak tapme pusekan golan weyan ti ambulupeme matatan ma keyet kejan Alongalen tonge ewenangatan petnanan mge kemak nanzan palen zii zet kukanan ma mana selikan golan weyan ti mana wewewien kemak eyo tâtâyelen bogis keyet kejan ilinsakwep bempenan. ⁵ Tâtâyelen bogis keyet saknanan gwaen ensel zut weyanideme egegat pâwidan bogis ke maambulutatemun keyet duknanan sâpe sâpe bumbu an nenan nup kan katan amgat yomin Kawawanan katikpepeyet nâmti songom sipman angalan gogot mundum zenenan bogis duknanan matatan keyet palen matetelimtemien.

Sesewat mka zegwem zegwem keyet zapatanan eneyet esemten mman delan zesem.

⁶ Kwitnaŋ kwitnaŋ kegok bempeme tapmepme keŋaŋ ŋeŋaŋ keyet sâpe sâpe bumbu an ekŋenaŋ mobot toti muluwin ke mamtemien. ⁷ Mka keŋaŋ kambuk penaŋaŋgat kambukŋaŋ keyet keŋanen sâpe sâpe bumbu an ŋeŋaŋ egaŋ nup kan kwep keyet keŋan sek kwewetaŋ mamotan. Yaŋgut soŋgom sipmaŋpiŋ yek, egaŋ sip timti mot ikŋaŋgat yomgat ma am yomtoŋ ekŋengat nâmti sip ke tetelime bogis dukŋan mundum kwitnaŋ aŋgalalaŋ gogot makumtemien keyet mamotan. ⁸ Emetak Teŋaŋ pigok manzikat ndain: sâpe sâpe bumbu anmak zii zetgalen zemâtâtât egetgalen muluwit am ningat tuŋgupmnan tazin beme nin Kawawaŋmagen mebeneknok sesewat mka keŋaŋ kambuk penaŋaŋgat kambukŋaŋ ke mebegalen setnaŋ mambekekzin. ⁹ Sesewat mka zegwem zegwem msalen tazin kapi bam kululuŋen katikŋaŋ sokbewe keyet sesepmaŋ bein. Mka zegwem zegwem keyet keŋan meu ma soŋgom timoti sâpe sâpe buwien keyaŋ zigoset am Kawawaŋgat masesewatsamtemien ekŋen keŋin mme kwetetepmaŋ benak? ¹⁰ Zii zet ke belak sekgeset etaŋ, tu meuyelen zetnaŋ ma sekŋ tu zulutpepeyelen zetnaŋetaŋ tage. Penaŋaŋ Kawawaŋaŋ msokbesâpmme tazin keyet sesepmaŋ mkwabien.

Kilaisiyaŋ ikŋaŋgat sipmaŋaŋ sâpe sâpe buye

¹¹ Kilais ek kwitnaŋ kwitnaŋ penaŋ sokbembeyet zenzeŋaŋ keyet sâpe sâpe bumbu an ŋeŋaŋ beye. Mti Egaŋ sesewat mka sepemaŋ igagen mobotnaŋ kululuŋen tazin keyet keŋan mowege. Amnaŋ ku walalatnaŋ ma msalen

ku tazinen keyet keñan mowege. ¹² Meme ma makau sipmanj timti ku moge. Ikñangāt sipmanj penañ ke mka keñan kambuk penangāt kambukñan ke mmoti sipmanj sek kwewetan tetelime mekoge keyañ tatāt katikñan matak-wazin. Sipmanj keyañ gakikiengātñan ndatim kwat ndeyeyañ alak mama kanzizitgāt zapat tat-nup. ¹³ Eweñan zii zelañ meme ma makauyet sipmanj timoti teteliliyet zenzenañ ma makau gandenañ bume zime mupmapmanj timti kâ kwakwatñan ke tuyen time topme lumañti keyañ am set zii mpepeñangalen anjosomti nukñan aiikñan keyelen gwesep mti tetelime mekoti am keyañ mimindeme am kwetetepmanj mambemtemien, ke sekgeset etañ mme kwetetepmanj mamimindemtan. ¹⁴ Keyangūt Kilaisiyet sipmanjanj songom ekñengalen siwin sebempemti mobotñan tazin e egañ yom ñen ku mge keyet penañan. Kilaisiyañ mama keboñ manje ke Emetak Teñ mama kanzizit mamainañ winde same mge. Ma naman egañ ikñangāt mamananj Kawawangāt sâpe sâpe nemboñ sayeyepm egat sipmanjanj nin zulutndeme teñ bewennañ Kawawañ mama kanzizit toñan ek ñep sisiliñ mulup msawanup.

¹⁵ Keyepmti Kilaisiyañ tâtâ alakñan keyelen an tuñgupmanj mobotñan penañ beye. Mti tâtâ itnananen mamti yom aik kwabien ke yek bembeyet ikñanj gakiye. Kogogapm am egat zapat ma-maip ekñenanj mama kanzizit mamayet zetik mimindendenañ ke ñep mepmamambep. ¹⁶ Betziñ toñan bembeyelen setnanj kapigok, an ñenanj gakime egalen betziñan ke an ñenanj belak etañ maekdamuñ min. Yan an titiyet nâmpenanj

keyañ damuñ tapmepme tonañañ gakimeñgut an keyañ matin. ¹⁷ Egañ ewe alik mame betzingat zetnañ zenzeñañ ke belak ewe tapme an keyañ gakimeñgut zet keyet penañañ ñep sokbenak. ¹⁸ Kogogapm tâtâ itnañañ ke penañañmak bem-beyelen nâmbiengapmti songom kume sipmañañ topme keyañ penañañmak mambemtan. ¹⁹ Moses ek zii zet sambe zemâtâtpepeñañ keyet katan am sambe diindome delañ zemâpme makau gande-nañgat sipmañ tumak lelimpeme tapme sindip palen sipsip zupmañ ñamañ keyañ zampemti keyañ siwenn olekti Kawawañgalen zet zapat meluwañmak muñgunñuñañ palen ma animbi ekñengat palen matetelintan. ²⁰ Mti pigok diindoye,

“Kawawañañ inmak tâtâ mimiyet diindoye keye-
len sip e ilak kapi.” *(Kisim Bek 24:8)*

²¹ Mti sesewat mka zegwem zegwem ma sâpe sâpe bumbuyelen batikondo mee ke kegogak siwañ tetelime sipsak mambemtan. ²² Ke zii zelen zenzeñañ keyet katan kwitnañ kwitnañ sambe katan siwañ etañ zulupme kwetetepmañ bemâge. Ma sippiñ keyañ amgat bekañañin zulupme delañ zenzeyelen setnañ ñen ku tazin.

Kilaisiyañ ningalen yomgat dopmañ gakiye keyañ sâpe sâpe bumbuñañnok beye

²³ Kwitnañ kwitnañ sesewat mka zegwem zegwemgat tazin ke penañ kululuñen gwaen tazin keyet sesepmañ kegogapm siwañ tetelime dukñinan mopme kwetetepmañ bembeyet zenzeñañ keyet sâpe sâpe mambumtemien.

Kogogapm am kululunən mebegalen ekņen mme kwetetepmaņ penaņ bembeyelen sâpe sâpe sakamaņ igagen dolakņaņ penaņ bumbuyelen. ²⁴ Keyepmti nin nânup Kilais egaņ sesewat mka amnaņ belinan walalatnaņ keyet keņa kambuk zeip keyet sesepmaņ msalen tazin keyet ku moge. Kawawaņgalen sesewat mka keņa kambuk kululunən tazin keyet keņa moti Kawawaņgat ņenzimoseņnaņ nin ndamukulem mimiyet nâmti mandundum sain. ²⁵ Kilaisiyaņ iķaņegak Kawawaņgat sâpe sâpe sasayet sek kwep gakiye. Ke ewe sakwalambemti ku mimiyelen. Kogok mti egaņ kululunən mogeyaņ tazin. Egaņ zii zelaņ zeinen sâpe sâpe bumbu an ņeņa egaņ nup kan sambe amgat yomin timti sek kwep mka keņa kambuk penaņaņgat kambukņa zeijen moti soņgom ekņengalen sip matimotemien keboņ ke ku mge yek penaņ. ²⁶ Kilais ek kegok mnak ze msat kululuņ sokbeye keyetnaņ kwazinen amgalen yomgat mti Kilaisiyaņ gakimti gakikiyegak mamananak. Yaņgut kegok yek. Egaņ sek kwewetaņ gakimti yom sambe mkwakwatnaņ ma mimiņa ma mmobep ekņen keyet katan sek kwep dopmaņin gakim delaņ zeye. ņen ewe ku sakwalambemti gakikiyelen. ²⁷ Am sambe nin sek kwewetaņ gakiwanup. Mti keyet baman daenen zet muluwen tabanup. ²⁸ Kegogapmti Kilaisiyaņ iķaņgat palen am sambeyelen yom time mopme sek kwep gakiye. Kegok mgeyepm gilik zem kosâpmnen yom katikpepeyelen mulup ewe ku msâpm. Am egat nâmkijpenti webem maip ekņen mama kanzizit

indasâgât kosâpm.

10

Sâpe sâpe nênanj mambumkwatemien keyanj yom nep ku makatikpemtan

¹ Zii zelen sâpe sâpe bumbuyet zenzenanj ke kwitnanj kwitnanj dolaknanj bam sokbewe keyet sesepmanj etanj mkwabien. Keyepm sâpe sâpe bumbu an eknenanj zii zet gawepumti nup kan katanj sâpe sâpe bumti bumbuyak mkwapme am Kawawanj masesewatsatemien eknen kenjin mme kwetetepmanj tatat katiknanj ku matatan. ² Sâpe sâpe mambumtemienanj am mme kwetetepmanj bewiek ze eknenanj sâpe sâpe mene mene ewe ku mambumambiek. Keyanj am Kawawanj masesewatsaip eknen mme yompij sipmanjmak kwetetepmanj bewiek ze eknenanj yominangat kenjinan nâmnuknanj ewe ku mbiek. ³ Sâpe sâpe kan nen kan nen mambumkwapme keyanj mme eknenanj yominangat manâmkwatemien. ⁴ Makau apmanj ma meme egegat siwidanj yomin nep ku zulupme delanj zemâtnak.

⁵ Keyepmti Kilaisiyanj msalen kogeen Kawawanjgat zet pigok zeye,

“Gej songom kumti sâpe sâpe mambuip keyet tiknanj penanj ku manânik. Yangut gej nenj am sek kot mundunđungat ewenjanegak weyanj bempemane tage ke koti mundunđi sâpe sâpeyelen songomnok bema nome

gakiwan. ⁶ Geŋ soŋgom melesin ambepeme tewen motati zim totot ma amnan geŋ yomin katikpepeyet nâmti sâpe sâpe bumgame keyet nâmane tikŋaŋ penan ku mambein. ⁷ Âpme nenangat pigok zewi, ‘Kawawaŋ, nânik, neŋ gâlen zet gawepupuyet msalen toban. Gâlen Zet Itnananen meluwaŋ mimiŋaŋ keyet penanŋ ilak neŋ kapi kotalap.’ ” (Sam 40:6-8)

⁸ Sâpe sâpe bumbu keyet zii zelan pigok zeye, “Sâpe sâpe soŋgom melesin ambepeme tewen motati zim totot ma amnan geŋ yomin katikpepeyet nâmti sâpe sâpe sakam ikŋak ikŋak mambumgaip ma tewalaŋ notnaŋ mamgaip keyet nâmane tikŋaŋ penaŋ ku mambein.” (Sam 40:6)

⁹ Kogok zemti naman zet nen pigok zeye, “Kawawaŋ, nânik, neŋ gâlen zet gawepupuyelen msalen toban.” (Sam 40:7)
Egaŋ zet kekok zeye ke kwitnaŋ kwitnaŋ itnaŋaŋ mpeme mepme alakŋaŋ nen mwatonzempesâgât nâmtiyepmti zeye. ¹⁰ Keyepmti Zisas Kilaisiyaŋ ikŋaŋgat sekŋaŋ ke Kawawaŋ sâpe sâpenok ketalasim same keyaŋ nin keŋ mme kwetetepman bewen. Ke sek kwewetaŋ mge keyaŋgut keyet pembedanaŋ kwesin wemti wembe.

¹¹ Sâpe sâpe bumbu an sambe ekŋenaŋ kasup nen kasup nen sesewat muluwin mti sâpe sâpe bumti bumbuyak mamkwetemien. Âpme keyaŋ yomin nep ku peme mebegalen. ¹²⁻¹⁴ Kilais egaŋ yomgat sâpe sâpe gakikiŋaŋaŋ mise kwep sâpe

sâpe mambumkwatemienok bumdelan zemti an-
imbi mme kwetetepman bewienan eknen kwe-
sinj kwesinj mambep. Eknen egan sâpe sâpe
kwewetan bumti mme dolaknan etan bemâpme
gwaenen mogeyan Kawawanğat betnan penaset
totazin.

“Mme mundum ke tapme Kawawanğan kasanane
indatimti egat setnan kandan timot mu-
laloğ indeweyet damuğ tazin.” *(Sam
110:1)*

¹⁵ Keyet Emetak Tenan Kawawanğalen Zet It-
nananen kapigok zemsokbemndain,

¹⁶ “Kan kapi delan zeme neğ bam eknenmak
tâtâ alaknan nen mbap. Neğ zii zet zetn
keñinanen bem indema tabep. Ma neğ
zii zetn ñoktikñinanen meluwan mpema
tabe.” *(Zelemia 31:33)*

¹⁷ Mti Egan ewe zet pigok tusumti zeye,
“Keyepmti neğ yominanğat ma
myunğunğuninanğat kandatnome
mamambap.” *(Zelemia 31:34)*

¹⁸ Kogogapm Kawawanğan yom katikpewe beme
sâpe sâpe bumbu an eknenan sâpe sâpe yom
peme mebegat zembuwep ke yanepinğ.

*Nin Kawawanğ nâmkinğemti ekmagen sokñan
mabanup*

¹⁹⁻²⁰ Eweñan sanğum sesewat mka zegwem
zegwem keñan zut kalañme mekotatagat anzam
matatan ke Zisasiyanğ gakime endelege. Kegok
mti egan set alaknanğ sipmanğanğ zulutndeyeyepm
nin sesewat mka keñanğ kambuknanğ penanğat
keñan meti kwesinj mamambanup. Kogogapm

Kilaismagen notnne, Zisas ikranggat sipmanan ningalen yom zulugeyepm nin Kawawanmagen kinagapiñ ekmagen soknan nâmtalati mamep-mambanup. ²¹ Âpme ningalen sâpe sâpe bumbu an ñeñan Zisas egan Kawawanhalen sesewat mka kenan ke bugan ñeñan bemti megeyepmti ²² nin ek nâmkijpemann keyan kenanhalen yom sambe sipmanan zulut kaputme mepme delan manzein. Kogogapm nin yommnanngat nâmnuknan ñen ku mimiyelen yek. Nin nâmtalatmepmann tu penanan zulutndewiennok kenan penan suk-wep nâmbanup Kawawanan ñep ndamukulem mbe zemti ekmagen soknan mepmamambanup. ²³ Âpme Kawawanan zetiki mti zet manzeinen penananmak etan mambein. Ke nâmtiyepm nâmkijpepen ku katikpewanup kalinan atam tabanup. ²⁴ Mti nin notnne indamukulem mimiyet setnaset etan mâti kenin melen belan bemti gogot mimindewanup. ²⁵ Âpme Kawawanhalen zet nânâyelen ondedagen am notnan eknenan kokopiñ belak wisat mti matalip. Pi Zisas kokogalen kan ilak soknan bein kegogapm nin Kawawanhalen zet nânâyet ondekti notnne ekngat kenin melen belan bewanup.

Nin Kawawanngat Nemunan ku bamkumpewanup

²⁶ Yomgat sâpe sâpe bumbuyelen setnan ñen ku tazin. Kogogapm nin zet penan noteknan Zisasiyan ningat yomgat gakiye zet ke kenanngalak bamkumpewanup beme ningalen yom katikpepeyelen setnan ñen kogogak ku tatndawe. ²⁷ Enenogat Zisasiyet

gakiŋaŋ ku nâmkŋpemann keyet dopmaŋ Kawawaŋaŋ zemdelaŋ zenze muluwen ndesâpm egalen zet zemdelaŋ zenze mulup kanaŋ ke kiŋgagatnaŋmak ma tep taŋam temaŋmak manzin keyaŋ am Kawawaŋgat kasa mamip ekŋen ke indazime mupmamaŋ etaŋ bewep. ²⁸ Nin pigok nânup an ŋenaŋ Mosesiyelen zii zet ke aŋgosome an zut ma tuk ekŋenaŋ ekti mimyuŋgugaŋaŋ ke zemkawaŋ bewep beme ekŋenaŋ an keyet kembeŋ ku mbep ek kume gakiwe. ²⁹ Âpme naman kogogak. An ŋen ek Kawawaŋgat Nemuŋaŋ zemtalatpenti mtopewe ma tâtâ alakŋaŋgalen sip zulutme keyaŋ keŋaŋ mme kwetetepmaŋ beye keyet nâme pepesut bewe beme dopmaŋ bekanaŋ penaŋ tiwe ma keŋ taoletgalen Emetak Teŋ am mme keŋ taolet palen mamaip zemtalatpewe beme am ekŋen ke nukŋaŋ omba penaŋ tiwep. ³⁰ Nin zet kapigok zeye ke nin nânup,

“Yom dopmaŋ mutumindanda mulup ke nen mbap.” *(Zii Zet 32:35)*

Ma ŋen ewe pigok zenzeŋaŋ tazin,

“Amobotnaŋ ek amŋene ekŋengalen zet zemdelaŋ zemindamâbe.” *(Zii Zet 32:36)*

³¹ Kawawaŋ mama toŋaŋ egalen belen am yommak yomgat dopmaŋ mutumindawe ke kwitnaŋ kwitnaŋ kiŋgagatnaŋmak penaŋ.

Nin nâmkŋpepeen katikŋaŋ bemti tabanup

³² In alagalak nâmkŋpepeen yaŋbemti tabien keyet otnâit. Kan keyet in Kawawaŋaŋ Emetak Teŋ indame egaŋ busatnaŋ indame timtati amnaŋ sisipenpeŋ mindamti sek sindem indame

in timti keyet keŋan in windenŋan bemti tabien.
³³ Kan notnaŋgat ekŋenaŋ animbi sambe ekŋengat zikalinan indati mozem indome tabien mti zet mgasik gasik penaŋ pi mandiindoip mti nukŋaŋ sambe dukŋinan bemindewien. Kan notnaŋgat in am noline kwitnaŋ kwitnaŋ keboŋ sokbeme indikti indamukulem mimindewien.
³⁴ In nolin notnaŋ mka katikŋaŋ towepme ekŋengapmti kemberŋ temaŋ mbien. Ma milom bilombi omenzaŋ time in keŋin oloŋen palen tati indikme belak tiwien. In kwitnaŋ kwitnaŋ kululuŋen tatatnaŋ katikŋaŋ bam tiwep ke nâmtiyepm kegok mbien. ³⁵ Keyepmti pi ekŋenaŋ kegok mindame windenŋin ku kwalebe. Windenŋan bem maneti bam penaŋaŋ temaŋ penaŋ tiwep. ³⁶ Mti in windenŋin bemti Kawawaŋaŋ kwitnaŋ kwitnaŋ in mimiyet manâmtikŋaŋ min ke mbep beme keyet katnaŋ mamti kwitnaŋ kwitnaŋ zetik mimindendenŋaŋ keyet penaŋaŋ tiwep. ³⁷ Keyepmti kan belaknik bugan tazin ke delaŋ zeme Kawawaŋgalen zelaŋ penaŋaŋmak bewe,

“Amobotnaŋaŋ kosât zeye ke ku katikpewe; egaŋ sakwep kobe. ³⁸ Neŋ am manâmkŋinpenep ekŋen nâmkŋinpepeŋin neŋmagen tazin ke ekti kwilin, ‘An teŋ,’ makuyap ma ekŋen nâmkŋinpepeen sukŋaŋ bewep beme neŋ ekŋengat nâmindema dolakŋaŋ penaŋ ku bewe.”

(Habakuk 2:3-4)

³⁹ Nin nâmkŋinpepeen sukŋaŋ bewanup beme walelet keyet keŋan mebegalen. Keyaŋgut nin am keboŋ yek. Nin am nâmkŋinpepemak bewenngapmti Kawawaŋaŋ mama kanzizit ndandaye-

len manje tatnup.

11

Nâmkinpepeyeen katikñan bemti mamayelen yañan

¹ Bamgat kwitnan kwitnan titiyet bunam zapatnan diindondonan keyet webemti damun mama ma kwitnan kwitnan zikalan eekpin belak kenan etan nâmkalin bemti mama keyan nâmkinpepe penan bein. ² Kawawanğalen am ewenən baen mamkwabien ekñengalen nâmkinpepe sepeman kebon mti mame Kawawanğan keyet nâmindeme dolakñan beye.

³ Kululun ma msat kapi Kawawanğan zeme sokbeye. Zet ke nâmkinpepemak mamti yañan manâmâtâtñup. Kwitnan kwitnan tapme ekñup kapi Kawawanğan kwitnan kwitnan ku wewenğatñan mme sokbeye.

Abelmak Inok ma Noa ekñengalen nâmkinpepeñin

⁴ Abel ek nâmkinpepemak manje keyepm Kawawanğat sâpe sâpe bumsame Kawawanğan ekme ñep beme datnan Kein egalen ektakalimpeye. Abel nâmkinpepeñanğapmti Kawawanğan an teñ zemti sâpe sâpeñan kogogak nâme dolakñan beye. Abelan gakiye yanğut egalen nâmkinpepeñan nin ekti mâbâğat sepem matazin.

⁵ Inok ek nâmkinpepemak manje keyepmti Kawawanğan ek ku gakikiyet nâmpemti sekñan melesin wati mowege. Kawawanğan keğok mme am ekñenan egat timabien. Ewe

kululuŋen mobopiŋ tapme Kawawaŋaŋ egat nâmkijpepeŋgat nâme dolakŋaŋ penaŋ beye. ⁶ Nin nâmkijpepepiŋ maman Kawawaŋaŋ ningat nâme dolakŋaŋ ku bewe. Nin Kawawaŋaŋ mamain ke penaŋ nâmkijpewanup mme am ek aiksâgât winderŋaŋbenŋ matimalip ekŋen egaŋ tosa dolakŋaŋaŋ maindain.

⁷ Noa ek nâmkijpepemak maŋge keyepmti Kawawaŋaŋ kwitnaŋ kwitnaŋ bam sokbewe keyet golaŋaŋ zemsokbemsame nâŋge. Dundume ek pedondom samti sip kwep ekŋen alik mamayet nâmti waŋga walage. Kegok mge keyaŋ msat katanŋalen am bekaŋaŋ mimi toŋaŋ kegok msokbeye. Noa nâmkijpepeŋgaŋpmti Kawawaŋaŋ, “An teŋ,” kwitnaŋ kegok kuye.

Abalaamgalen nâmkijpepeŋgaŋat yaŋaŋ

⁸ Abalaam ek nâmkijpepemak maŋge keyepmti Kawawaŋaŋ msatnaŋ yaŋaŋ pempti msat ŋen met titiyet zempeme egaŋ zetnaŋ gawepuye. Mti msat deset sasayet zeye ke egaŋ nânâpiŋ belak etaŋ zetnaŋ gawepumti mege. ⁹ Nâmkijpepemak maŋge keyepmti msat zetik mpeye ke mege. Ke lueŋ maneti mesâtnok mka zegwem zegwem walati ke mawemtan. Aisakmak Zekop eget msat keyet Kawawaŋaŋ zetik mimidenderŋaŋpmti sepem kegogak mbun. ¹⁰ Abalaam ek mka tatat katikŋaŋ kululuŋen Kawawaŋaŋ timbilanŋe mpempti walatpeye ke sasayet nânâŋ mamamtan.

¹¹ Sela ek nâmkijpepemak mamti imbi ilip penaŋ ke beye yaŋgut Kawawaŋaŋ menok mme egaŋ namba kambakmak tage. Sela egaŋ kapigok nâŋge, “Kawawaŋaŋ zetik mam ke penaŋaŋmak

etan masokbein yan namba sokbembeyet bujam zapat zeye ke penanaj sokbewe.” ¹² Keyepmti an kwewetan ke am ambet munzunzungalen windenaj delan zeye yangut ekmagengatnan namba sokbem sambelenbien kululunen wenzim ma nembuyelen gambibik tazin amnan ku maiingalen nembon am keyet sepem sokbewien.

¹³ Am eknen keyan namkinpepemak mamti gakimâpme delan zeye. Kwitnan kwitnan zetik mimindendenaj ke belak benan daenen tapme ekbienangut ku timti ewe belak etan olojen palen namkinpepemak mamtemien. Kogok mti yanajin pigok ekbien, “Nin msat kapi belak luen ma am mukup mamanup.” ¹⁴ Am zet kebon manzeip eknenaj msat mamaip ke pemti met msalin penan nen aikgalen manâip. ¹⁵ Mti ilinangalen mka msalin pemti kobien keyet ku nambien. Keyet nambiek ze gilik zemti mesât nambiegen nep mebiek. ¹⁶ Kogok mmamti eknenaj mka tatat katiknan ke met titiyet kenin teman tage. Kululunen tazin keyet napej mambien. Keyepm Kawawanj ek ekngalen Kawawanj kegok zewanek keyet nâme bekanaj ku benak. Enenogat egan ekngat mka teman nen aikindawe.

¹⁷ Abalaam ek namkinpepemak mame Kawawanaj yanaj mekme egan Aisak sâpe sâpe bumbuyet sisak palen mobempeme tage. Egan zetik keyet penan Aisak nange yangut nemunan kwewetan ke Kawawanjat sasâgât mge. ¹⁸ Kawawanaj zetik pigok msaye,

“Aisak ekmagen insokdine sambe penan sokbem sambelenbep.” *(Sokbembe 21:12)*

¹⁹ Abalaaman ke kapigok nâmti mge, “Kawawan ek am gakikiŋaŋ mme wawatgalen windenŋaŋ tazin keyepmti gakinak ze naman Kawawanŋaŋ gilik zemtî gakikiengatnaŋ ñep mme watnak.” Njen kapigok mene zewanek, nemuŋaŋ sâpe sâpe mundumengatnaŋ watoge ke gakikiŋaŋgatnaŋ mwage sepem beye.

²⁰ Aisak ek nâmkîŋpepemak maŋge keyepmti egaŋ Isâ ma Zekop zemgwaŋnaŋ zet mimidamti kwitnaŋ kwitnaŋ bam sokbemidawe keyet zapatnaŋ diidoŋe.

²¹ Zekop ek nâmkîŋpepemak maŋge keyepmti gakikiyelen kanaŋ bududuk beme Zosepgat nem-ulatnene zemgwaŋnaŋ zet mimitdamti tonŋe palen tati Kawawan pedondom saye.

²² Zosep ek nâmkîŋpepemak maŋge keyepmti gakiki kanaŋ sokŋaŋ beme nâmti Israeŋ am ekŋenaŋ Izip msat pemti mebegat zapatnaŋ diindomti naman mesâtati kasetnaŋ mti mebegat eweŋanek zemâtâtindaye.

Mosesiyet nâmkîŋpepeŋaŋgat yaŋaŋ

²³ Mosesiyet mamaŋ bipmaŋ egelaŋ nâmkîŋpepemak mambun keyepmti namba sokbeme egelaŋ namba ke namba notnaŋ ekŋen nemboŋ yek keyepmti egomti Izip ekŋengalen amobotnaŋgalen zemkaliŋ bembe keyet kiŋgagapiŋ eyoŋga tuk pi enzilimpemalu matatan.

²⁴ Moses ek nâmkîŋpepemak maŋge keyepmti egaŋ sememti mame am ekŋenaŋ Palao egat nembanaŋgat nemuŋaŋ zenzeyet egaŋ keyet nâme wisatnaŋmak beye. ²⁵ Egaŋ Kawawaŋgalen

am ekñenmak kot tusumti nukñañ pupuyelen nâmti ekñenmak tusuye. Egañ mama mimi bekañañgalen tikñañ seleset mâti kan belaknik bugan oloñen mimiyet nâme ñep ku beye. ²⁶ An Kilaisiyañ nukñañgatnañ indatitiyet zetik mge keyañ sindem tiwenok Mosesiyañ timti Izip msatgatnañ mânep milawatgat tikñañ ku nâye. Enenogat egañ maneti bam tosañañ kululuñen tiwe keyet nâme mopme mañge. ²⁷ Mosesiyañ nâmkiñpepemak mañge keyepmti Palaoyelen ñenzinziñ keyet nâme betatnañ beme Izip msat katikpeye. Egañ Kawawañ amnañ zikalinañ ku eekgalen ke egañ ekti mimiñañnok ekmagen wetekumti tage. ²⁸ Moses ek nâmkiñpepemak mañge keyepmti Añgalalañ Kendo tage. Egañ zeme Israeël am ekñañ sipsip kumti sipmañañ sekekegen zuluþpemepme ensel egañ kasa tim kwati am indome gakikiyelen keyañ sip ke ekti nemuñine yu ekñen ku indome gakiwien.

Am eweñañ nâmkiñpepemak mambien ekñengat zapalin

²⁹ Âpme Israeël am ekñañ nâmkiñpepemak mambien keyepmti Kawawañañ zeme Nembu Namañañ epeemti metat kotat mme msalen imti tu nembet daeneset mowepbien. Âpme Izip am ekñengalen kasa kuku an ekñañ keyegak indamâti mowetne zemti metnepeme nembuyan munduman toti indaminziliye.

³⁰ Israeël am ekñen nâmkiñpepemak mambien keyepmti Zeliko mka kimbat temañ bembuluñ tati tokwapme kasup mulup mimi 7 kegok

mepme kimbata nanzanjan bembengan ke epeem topmâge.

³¹ Imbi set kilen mama kwitnan Leap ek nâmkijpepemak manje keyepmti an zut msat wilingiwun eget indikdamun mimideye. Âpme am zet kululu Israael ekjenan indowien kan keyet ek angalanpewien.

³² Yanjut zet zapat notnan Gidion

ma Belek
ma Semsân
ma Zapet
ma Dewit
ma Samuel

ma golan zet zenze an ekjenan miminjan ke zewagen kan teepman penan benak. ³³ Am notnan nâmkijpepemak mambien keyepmti am manje teman tintot indewien ma am notnan mama mimi tengat mulupman mbien. Ma am notnan Kawawanjan kwitnan kwitnan nen indasât zetik mge. Ma am notnan laiongat dembusekjan bekekbien. ³⁴ Am notnan tep teman tazime mme bep zeye ma am notnan kasaneyelen gembo kukjan witikme mege. Ma am notnan windenjinpinj winde indame windeniben tabien. Ma am notnan kasa kukuyen windenibenj tati kasa kuwien. Am notnanjan amobotnan neniyelen kasa kuku an ekjen windenjan bemti indamâpme mebien. ³⁵ Imbi notnan ekjengalen nempa gakiwien mme alik bemti wabien. Am notnan kasa ekjenan indatimti mka katikjan indemti sekjin omba penan indom walepme gakikiyelenok penan tabien. Ekjenan Kawawan bamkumpewien

ze kasa ekņenaņ ņep indemti mebiek. Yangut ekņenaņ kasa ekņengalen zet kumti ekņenaņ gakikiengatnan wati mama dolakņanaņ titi keyet nâmti katikņanaņ bemtabien. ³⁶ Am notnaņ ekņen kasa ekņenaņ indatimti kwelalin kumti sindiwaņ indawitikbien. Ma am notnaņ selin belin tek katikņanaņ zam indemti mka katikņan indeme nukņanaņ pumti tabien. ³⁷ Am notnaņ ekņen nanzaņaņ indome gakiwien. Am notnaņ ekņen sâyaņ indauluņme butnaņ butnaņ towembien. Am notnaņ wanam kukņaņaņ indaņme gakiwien. Am notnaņ ekņen kuņzuņpeņ mamti sipsip ma memeyet sekņinaņ saņgumnok ambulut mamtemien. Am notnaņ sekgalen bandingāt olat olat temaņ mbien. Āpe am notnaņ sisipeņpeņ mimindawien ma am notnaņ muluwaņ bekaņaņ penaņ mimindawien. ³⁸ Kegok mme notnaņaņ msat ampīņaņ mepmambien ma notnaņaņ kalaņ dukņaņ motabien ma notnaņaņ nanzaņ enzuņaņ wemwat mti mamamtemien. Am msat kapiyelen indikme ekņen bekaņaņ mimi toņaņ bewienangut bekaņaņ toņaņ penaņ am msat kapiyelen.

³⁹ Animbi ekņen ke nâmkīņpepemak mambien keyepmti ekņen Kawawaņaņgāt zikatnan mama mimiņin dolakņanaņ penaņ beye. Yangut Kawawaņaņaņ ekņen kwitnaņ kwitnaņ titiyet zetik mimindaye ke ku tiwien. ⁴⁰ Enenogāt Kawawaņaņaņ ekņen teņ kwakwagāt eweņaņ baen zetik mge ke ekņengāt etaņ yek. Nin eyo teņ kwakwagāt nâmti zetik mge.

12

¹ Animbi nâmkijpepejinmak sambe eweñan mamkwabien ekñen nukñañ omba timti gakiwien kululuñen mobienañ ekñen keyañ nâmkijpem mamayelen set bem ndawien. Ekñen keyelen nâmkijpepeyeen mama ke nin ekti mâbâgat set katñañ bempewien. Keyepmti nin nukñañ sambe ma yom ningat palen mamilik tazin ke katikpewanup. Mti zet zikat ndandañanen ke tati wisat mimipiñ Kawawañañ piliñ bemndeyen ke winde bemti mebanup.

² Mti Zisas nâmkijpepeyet ñeñañ bembe an ma nâmkijpepe keyet penañañ aiksâgat ek ektitimti mambe. Ek keñ oloñen temañ Kawawañañ bam sasayet zenzeñañ keyet nâmti keyepmti tewen moti sindem temañ tiye ma amñañ sakambuk omba penañ sawien ke nâmisimti mmeti Kawawañgaleñ mundumen moti egat betñañ penaset totageyañ tazin. ³ Eweñan am bekañañ mimi ekñenañ Zisasiyet kasa ñenzinziñ omba penañ mbien. Yanğut egañ ke kume topme nâmtalati windenañbeñ tage. In ek msawien ke ekti sebelin sukñañ ku bewe ma keñin keyet teenañ ku bewe.

Kawawañ Biengalen musuwewetñañ pembe- nañ

⁴ In nâmkijpepejinanğat yañañ meegat sindem indame nâme sindem omba penañ tazewağut inmagengatñañ ñeñañ ewe ku gakiye Zisasiyañ ningalen yomgat windenañ mtopepeyet gakiye

ke nembonj. ⁵⁻⁶ Ingat Kawawaŋaŋ, “Nemunambanne,” zeye zet ke in keŋinan mkatikŋaŋ bembeyet nâmti zein ke kandabien ma zigok?

“Nemun nambanne, Amobotnaŋ egaŋ am ŋen gogot mpesâgât nâmti ekmagen musuwewet mulup omba penaŋ mamindein ma egaŋ nemunambaŋane penaŋ ekŋen kegogak maindamusuwetindein keyepm Amobotnaŋaŋ gamusuwetgeme geŋ nâmane tototnaŋ ku bewe. Egaŋ geŋ gamusuwet gesât nukŋaŋ ŋen game geŋ keyet nâmane bekaŋaŋ ku bewe.”
(Totatgalen Set 3:11-12)

⁷ Nemba biwin dolakŋaŋaŋ nemunambaŋane mamusuwetindeip keyet kataŋ Amobotnaŋaŋ indamusuwesât mme in ke ekti windenjin ku kwalebe. Kawawaŋaŋ indikme nemunambaŋane beme sepem kegok ke mamimindain. ⁸ Nemba biwin dolakŋaŋaŋ nemunambaŋane mamusuwetindein. In ku indamusuwetindendenjaŋ beme in nemunambaŋane penaŋ yek, belak kambu indabebetnaŋ kegok bein. ⁹ Ma ŋen ewe pigok zema nâit, bipmne msalengatnaŋ ekŋen kapiyaŋ indamusuwepme in ekŋengat kandaŋinan meti zelin maŋgawepuip. Keyet kataŋ an indapmge Kawawaŋ Bien mama kanzizit toŋaŋaŋ indamusuwepme nin egat kandaŋan meti zetnaŋ gawepunup. Enenogat egaŋ mama kanzizit keyet penaŋaŋ ndawe. ¹⁰ Bipmne ekŋenaŋ nânânjin tage bukeyet kataŋ kan belaknik bugan ke ndamusuwet ndemkwabien. Âpme Kawawaŋaŋ

gulak ninmagen kwitnaŋ kwitnaŋ pembenan sokbemndasâpmme mandamusuwezin ke iknaŋ nembon teŋ bembeyet nâmti manndamusuwezin. ¹¹ Musuwetndeme nâman sindemaŋmak mambein. Yanŋut sindem keyet keŋaset Kawawaŋaŋ nânâ dolakŋaŋ ndame keŋ sewakŋaŋ maaiknup ma egaŋ nin mama mimi teŋ mimiyelen manâinen ke mamnup.

¹² Keyepmti in nâmkînpepeŋinan nukŋaŋ sambe in taaikme keyaŋ sebelin mme ma sukŋaŋ bein kegogapmti Kawawaŋ dundum same egaŋ winde indame dopmaŋ bandim dopmaŋ bandim mti winderinberŋ tabep. ¹³ In wati mama mimiŋin teŋ mama seleset mâti im mepme nâmkînpepeen noline ekŋen nâmkînpepeen kaliŋaŋ ku matalip keyaŋ indikti Kawawaŋgalen mama mimi mâti mbep. ¹⁴ In am sambemak keŋ sawakŋaŋ palen mamayet mulup winderanberŋ mbep. Ma keŋin kwetetepmaŋ benti mamayet mulupmaŋ mbep. An ŋen keŋaŋ kwetetepmaŋ ku tabe beme egaŋ Amobotnaŋmak ku mambe. ¹⁵ Inmagengatnaŋ ŋen Kawawaŋgalen keŋ taoletnaŋ ŋen witikme mebeyet dopmaŋ damuŋ dopmaŋ damuŋ mbep. Mti ŋenzinŋat kindiŋaŋ zewet niŋgesatnok peme petnaŋ epeem kwati in sambe indabumti keŋin mme yunŋu temebemagengat eksemi mambe. ¹⁶ Mneti inmagengatnaŋ notnaŋaŋ set kileŋ mambepgat eksewep. Ma an ŋenaŋ Kawawaŋ bamkumpewemagengat Isâ egaŋ eweŋan mge kegok ku mbep. Egaŋ meu isikŋaŋ bugan keyepmti egaŋ ayuyelen betzin biwinaŋ indandayelen beke ketalasiye. ¹⁷ Âpme in keyet

nâip ek bam betzin sasayet zetik mimiñan ke ku sasanan. Isâyan bipmanan betzin sasayet omba penan samsame keyan bipmangat keñan ku mgilik zeye, yek penan. Belak etan sum olage.

Kawawanğalen kalan alakñan ikñan tazinen ke mobien

¹⁸ In Zuda am ekñenan kalan ñen belan ñep ku timepmegalen keyet keñan ku patan zewien yek. Ma kalan tep teman manzin ma tambusosok kiñkiñan manzamtazin ma tâgâ windenañben makun keyet keñan ewe ku mebien. ¹⁹ Ma lumun kwisak ma zet bimñande gâlânan teman ke ewe ku nâmbien. Am kwitnan kwitnan eknâmbien ekñenan Kawawanğalen bim ñande ke ewe ke nânâyet Moses samsawien. ²⁰ Zet kapigok zenzenañ keyepmti ekñenan nâme kiñgagatnanmak beye,

“Am ma songom mene ñenan kalan ke timakbe beme ek nanzanan timti kume gakiwe.”
(*Kisim Bek 19:12-13*)

²¹ Ekñenan kwitnan kwitnan sokbeme ekbien keyet wenjin mebetnan mamtemien. Âpme Mosesiyan kwitnan kwitnan ekmâge keyet pigok zeye,

“Neñ kiñgati sebelan diñdiñ penan miya.” (*Zii Zet 9:19*)

²² In kalan keboñ keyet ku mobien. In Saion kalan Kawawanğala mama tonan egalen Zelusalem mka teman kululun tazin ke patan zewien. Ensel sambe sopman penan ondektati oloñen mti tapme in tunğuwinan patan zewien. ²³ In Kawawanğalen nemanane penan ekñengalen

ondedagen patan zewien. Ingat kwilin Kawawaŋaŋ mamayelen muluwaŋ kumpeyeyaŋ kululuŋen gwaen tazin. Ma Kawawaŋ am sambe ningat zemdelaŋ zenze an teŋ ekmagen patan zewien. Mti am sambe nâmkînpepeŋinmak Kawawaŋaŋ mme teŋ bemti mamgakiwien ekŋenmak tusuwien. ²⁴ Âpme Zisasiyaŋ tâtâ alakŋaŋgalen ŋeŋaŋ bembe an beye eweŋan egaŋ tâtâ ke mkatik bembeyet sipmaŋ mulage. Abeliyet sipmaŋaŋ yomgat dopmaŋ mututuyet kwizet makuin yaŋgut Zisasiyet sipmaŋaŋ am aŋgalaŋindemti keŋ sewakŋaŋ mimindandayet kwizet makuin ekmagen kopataŋ zewien.

Nin weyaŋ eksemti mambanup

²⁵ Eweŋan Mosesiyaŋ Israeŋ am golaŋ zet diindome zetnaŋ ku gawepumti bamkumpewien. Kegok mme Kawawaŋaŋ yomin ke ekti dopmaŋ bekaŋaŋ penaŋ mutumindame ekŋenaŋ Kawawaŋgalen ŋenzinziŋ kemagen enzililiyet setnaŋ ŋen ku tage. Âpme alak pi Kawawaŋaŋ kululuŋen mamti golaŋ zet tadiindome egalen zet ke gawepupupiŋ bamkumpenup beme keyet dopmaŋ penaŋ sukwep bekaŋaŋ penaŋ mutumndawe. Egalen ŋenzinziŋaŋ nin ŋep ku enzililiyelen kogogapm eksemti mambanup. ²⁶ Eweŋan penaŋ Kawawaŋaŋ zet zeme Sainai kalaŋ titok temaŋ penaŋ mge. Mme Kawawaŋgalen Zet Itnaŋanen zetik ŋen kapigok mgeyaŋ tazin, “Neŋ msat etaŋ ku butesowap; neŋ kululuŋ ma msat ilisakwep omba penaŋ idabutema titokŋit temaŋ msâbulup.” *(Hagai 2:6)*

²⁷ Kwitnaŋ kwitnaŋ butesât zeye ke yaŋaŋ kapigok, kwitnaŋ kwitnaŋ Kawawaŋaŋ zelaŋ zeme sokbeye ke mbuteme yek bewe. Mti na-man kwitnaŋ kwitnaŋ alakŋaŋ zeme wembe ke mama kanzizit tati titokŋinpiŋ penaŋ wembe.

²⁸ Kwitnaŋ kwitnaŋ titokŋepiŋ mama kanzizit tabe ke Kawawaŋgalen zemâtâtât katnanen mama ke nin met toŋaŋ bemti mambanup. Keyet Kawawaŋ zemesewatpenti mambanup ma egat nâmann mopme nin mtot mamti ikŋaŋ mama mimi nâme tikŋaŋ mambein ke mti sisiliŋ msamti mambanup. ²⁹ Enenogat Kawawaŋ ek taŋam temaŋ kwitnaŋ kwitnaŋ bekaŋaŋ zime mupmapmaŋ mambemtozin ke toŋaŋ ek.

13

Nin notnne ekŋengat kemberŋ mimindewanup

¹ In am nâmkinpepeninmak keyepmti in kan katanŋ Kilaismagen nolinemak gogot mamambep.

² Am mukuwaŋ mkaŋinan kopme in indikti wisat ku mimindawep. Am notnaŋ ekŋenaŋ wa am timbumuluŋnup zemti ensel timbumuluŋbien. ³ In noline mka katikŋaŋ talip ekŋengat nâmindeme in ekŋenmak mka katikŋaŋ talip kekok bewe. Am notnaŋ sek sindem timti nukŋaŋ palen talip in indikti nukŋaŋ ke in timti tapmaipnok bewe.

⁴ Kawawaŋaŋ am awembiŋ mamaŋin myuŋgumti set kileŋ maip ma am awembiŋ mamaŋin kambu setnaset mamaip ekŋen ke Kawawaŋaŋ dopmaŋ bekaŋaŋ mutumindawe keyepm in sambemagen awembiŋ mama ke damuŋaŋ dolakŋaŋ penaŋ mbep. Awembiŋ

mama ke mame Kawawangat zikatnan kwetetepman penan bewe. ⁵ Amobotnanañ pigok zeye,

“Neñ ku katikgewap. Ma giktingut ku gigiknañ sepem ku mambap” *(Zii Zet 31:6)*

keyepm milawatmak mamayet keñin temañ ku bewe. Kwitnañ kwitnañ taindain katan ke tim mamti naman ewe omba penan titiyet ku nâmbep. ⁶ Kogogapm nin winden tim tati pigok zewanup,

“Amobotnañ ek an mukulem toñañ keyepmti am ekñañ kwileki ñen mnanayet ku kiñgalap.” *(Sam 118:6-7)*

Nin Kawawangalen mama mimi zikat ndandañañ ke mâbanup

⁷ Am ñeñañ bembenjin ekñañ Kawawangalen zet diindowien keyet nâpeñ mamambep. Ekñañ set keyegak mâti mamkwatneti gakimâbien ekñengalen mama ke mâti nâmkijpepemak mambep. ⁸ Zisas Kilaisiyet yañañ eweñañ manje sepem kogogak alak tapmain yañ ewe mameti mambe katikñañ.

⁹ Am notnañañ Kawawangalen zelañ kapigok tazein zemti pigok tazeip, “In meu kapi nbep,” ma “Meu notnañ kanda ku niniyelen,” zet dâsuki kekok manzeip. Zet kebonañ am nâmkijpepenin ku mambandim min. Kawawangalen keñ taolelañ etañ nâmkijpepe mambandim min keyepmti am notnañañ zet nâmkijpepe bandim mimiyelen ku tazeme in indik kiñgatindewep. ¹⁰ Ningalen tâtâ alakñañgalen sâpe sâpe sisak palen tazin keyañ eweñañ sâpe sâpe bumbu

an ekñenañ sâpe sâpe sesewat mka zegwem zegwemen mambumtemien ke sebempein. Zisas ek ikñañ ningalen sâpe sâpe nemboñ. ¹¹ Eweñañ kapigok mamtemien: songom bimañ elengeme sipmañ topme sipmañ sâpe sâpe bumbu an ñeñañ ekñenañ amgalen yom zulusâgât mka keñañ kambukñanen keyet keñañ mti mopme penañañ mti zupman meti tewen mambumtemien. ¹² Âpme Zisas ek kegogak sipmañañ am mme kwetetepmañ bembeyet Zelusalem mka temañ pem toti zupman kume gakiye. ¹³ Keyepmti nin Zisasiyelen mañgeen tusumti egañ sakambuk tiyenok nin kogogak timti tabanup. ¹⁴ Kogogapm nin kapigok nâne: Mka tatat katikñañ msalen kapi ku tatndain. Bam maneti mka tatat katikñañ kululunjen matapmambe ke sokbesâpmgat keyet keñj temañ bemti mamambanup.

¹⁵ Keyepmti nin Zisasiyet pembenangat Kawawañ mene mene sesewatsamti maman keyañ egat sâpe sâpe mobotnañ ñen bewe. Nin dembusekñañ Kawawañ kwizet buñañ zempalakñañ bemti mamambanup. ¹⁶ Ma in animbi ekñenmagen mama mimi dolakñañ mimiyet wisat ku mbep ma dopmañ mukulem dopmañ mukulem mbep. Kawawañañ sâpe sâpe ke nemboñ keyet nâme tikñañ mambein.

¹⁷ An ñeñañine ekñengalen zet gawepumti kandeñinan mtoti mambep. Ekñenañ ingalen nâmkiñpepe ma keñin maekdamuñ mamiwañ maneti bam muluwinangat yañañ Kawawañmagen zemkawañ bewep. Keyepmti muluwin keñ oloñen palen mimiyet in zelin

gawepuwep. Kegok mbep beme in ekngalolen muluwinaŋgat nukŋaŋ ku indawep ma naman inmagen kogogak totatat pmbenaŋ sokbewe.

18 In ningat mandundum mambep. Nin nâmtatnup mama mimi dolakŋaŋ mbenn ke ŋoktikŋnanen nâmtelenj zemtati mbenn. Kawawaŋgalen zelen tazin ke mâti mamayet manâmkatikbenup. 19 In nâgât otnâmti dundupen tapme neŋ Kawawaŋaŋ namukulem mme inmagen sakwep kobap.

20 Neŋ inmagen kapigok sokbembeyelen nâmti mandundayap: Kawawaŋ keŋ sewakŋaŋ toŋaŋaŋ ningat Amobotnaŋaŋ Zisas ekgakikiengatnaŋ mme wapme sipsip ekngalolen damuŋ dolakŋaŋ penaŋ onzempeyeyan tazin. Ke egat sipmaŋaŋ tâtâ alakŋaŋ delan zenzenepiŋ wemti mawen ke mme penaŋaŋ sokbeye. 21 Kogogapm Kawawaŋaŋ winde indamti indamukulem mme in mama mimi egaŋ nâmtikŋaŋ mamin ke mbep. Mme Zisasiyaŋ ningat keŋnanen Kawawaŋaŋ mama mimi nâmtikŋaŋ mam keyet mme sokbewe. Kegok mimndame nin keyet Zisas Kilaisiyet kwitnaŋ mwatonzempemti kwesiŋ kwesiŋ masesewatsamambanup. Ke penaŋ.

22 Kilaisimagen notnne, neŋ in kapigok mimiyet apitilim indemti keŋin melenj belej bema tatagalen zemgwatnaŋ zet kapi diindosâgâti zapat meluwaŋ kapi teepmaŋ penaŋaŋ ku kuyap yek.

23 Ningat notn Timoti ilak mka katikŋaŋgatnaŋ peme zupman tolep. Egaŋ kot sokbemnain beme nilizuzut inmagen kopmalu ndigip.

²⁴ Neŋ ingalen an ŋeŋaŋ nâmkîŋpepeŋinmak sambe maip indamukumindeyap. Am nâmkîŋpepeŋinmak Itali msalen mamaip ekŋeŋaŋ kogogak indamukumindeip.

²⁵ Kawawaŋgalen keŋ taolelaŋ inmagen wemti wembe.

Kawawangalen Tâtâ Alakŋaŋ
The New Testament in the Nabak Language of Papua
New Guinea

Nupela Testamen long tokples Nabak long Niugini

copyright © 1988 Wycliffe Bible Translators, Inc.

Language: Nabak

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 11 Nov 2022 from source files dated 9 Oct 2020

ea68a902-358a-5c72-82de-a583fc4809e7